


# R A P P O R T

## Undersøkingar av elvemusling i 2018 og status for arten i Hordaland



Rådgivende Biologer AS 2822





# Rådgivende Biologer AS

**RAPPORT TITTEL:**

Undersøkingar av elvemusling i 2018 og status for arten i Hordaland

**FORFATTARAR:**

Steinar Kålås

**OPPDRAKGIVAR:**

Fylkesmannen i Hordaland og Trøndelag har gjeve støtte til arbeidet

**OPPDRAGET GITT:****RAPPORT DATO:**

12. mars 2019

**RAPPORT NR:**

2822

**ANTAL SIDER:**

62

**ISBN NR:**

978-82-8308-585-3

**EMNEORD:**

- Truet art
- Rødlistet art
- Ansvarsart
- DNA

- *Margaritifera margaritifera*
- Inventering
- Habitatkvalitet
- Redokspotensial

RÅDGIVENDE BIOLOGER AS  
Edvard Griegs vei 3, N-5059 Bergen  
Foretaksnummer 843667082-mva  
www.radgivende-biologer.no      Telefon: 55 31 02 78      E-post: post@radgivende-biologer.no

**Rapporten må ikkje kopierast ufullstendig utan godkjenning frå Rådgivende Biologer AS.**

## FØREORD

Elvemusling (*Margaritifera margaritifera*) er ein art i tilbakegang i Norge, og derfor raudlista som sårbar. Den er samstundes ansvarsart for Norge, sidan tilstanden for arten er svært dårlig elles i utbreiingsområdet.

Om ein skal forvalte elvemuslingen på ein god måte er det sentralt å vite kor mange bestandar ein har og kvar desse lever. Grunnleggande informasjon om bestandsstorleik og bestandsstruktur er også viktig. Vidare vil ei avklaring av faktorar som påverkar bestanden negativt vere nødvendig om ein vil bøte på desse. I denne rapporten, som summerer opp ulike arbeide vi har gjort i Hordaland i 2018, har vi vore innom alle tre emna.

I tillegg er her oppsummert historisk informasjon om førekomst av elvemusling i Hordaland og presentert status for innsamling av DNA-prøvar frå elvemuslingbestandar i Hordaland.

Til slutt oppsummerer vi kunnskapsstatus for elvemusling i Hordaland ved utgangen av 2018.

Ved teljinga av elvemusling i Femangerelva i juli 2018 deltok Katrine Åmdal Sundt, Kristin Lian Aa og Torill Horvli. Ingeborg Elisabeth Økland deltok under redoksmålingane i Haukåselva og Bjart Are Hellen deltok under inventeringa i Fjordabekkjen. Conrad Blanck utarbeidde kart til rapporten. Redokspotensialmålingar skulle også vore utført i Loneelva i september 2018, men store nedbørsmengder og høg vassføring i elva gjorde det umogleg å gjennomføre målingane.

Dette arbeidet er utført etter initiativ frå Rådgivende Biologer, og med støtte frå Fylkesmannen i Hordaland og Fylkesmannen i Trøndelag.

Bergen, 12. mars 2019

## INNHOLD

Føreord .....	2
Innhald.....	2
Samandrag.....	3
Innleiing .....	4
Metodar .....	5
Historisk kjente førekomstar av elvemusling i Hordaland .....	7
Søk etter elvemusling i elvar rundt Dåfjorden og Bjørnafjorden i 2017 og 2018 .....	11
Inventering av elvemuslingbestandar i tre elvar i Hordaland i 2018.....	19
Målingar av redokspotensial i elvar med elvemusling i Hordaland i 2014 og 2018 .....	31
Oversikt over innsamlia DNA prøvar av elvemusling i Hordaland .....	38
Status elvemusling i Hordaland 2018.....	39
Referansar.....	53
Vedlegg .....	56

## SAMANDRAG

Kålås, S. 2019. *Undersøkingar av elvemusling i 2018 og status for arten i Hordaland. Rådgivende Biologer AS, rapport 2822, 62 sider, ISBN 978-82-8308-585-3.*

Førre status til elvemusling i Hordaland vart sett i 2010. Status for arten i Hordaland er no revidert og sett ved utgangen av 2018, basert på kunnskap som har komme til i løpet av dei siste åtte åra. Det er no kjent 16 elvar i Hordaland med levande elvemusling. I Lonevassdraget på Osterøy lever to separate bestandar av elvemusling. Det var dermed sytten bestandar av elvemusling i Hordaland. Rett nok er nokre av bestandane så fåtalige at det er usikkert om dei kan kallast ein bestand. Vi kjenner også til elleve vassdrag der elvemuslingen har levd, men der den no sikkert eller mest sannsynleg er tapt.

Ved gjennomgang av litteratur er det funne beskrivingar av elvemusling i åtte vassdrag i Hordaland før ca. år 1900. Sju nye bestandar vart beskrivne fram til år 2000. Etter dette har vi, fram til og med 2018, fått informasjon om ytterlegare sju elvar der det lever elvemusling og fire elvar der den truleg er tapt.

Berre bestanden i Oselva i Os kommune er no talrik og rekrutterer godt. To andre bestandar, i Hopselva i Fusa og i Fjordabekkjen i Fitjar er såpass talrike og rekrutterer såpass godt at dei kanskje vil klare seg sjølv, om miljøet held fram å vere godt. I dei andre vassdraga i Hordaland der det lever elvemusling er bestandane så fåtalige, og/eller rekrutteringa såpass dårlig, at bestandane vil trenge hjelp for å klare seg. I mange av elvane er habitatkvaliteten så godt at det truleg held å forsterke bestandane ved oppavling og utsetting av små muslingar. Elvemuslingane treng truleg ein minimum bestandsstorleik før dei sjølv kan rekruttere tilstrekkeleg til å oppretthalde bestanden. I nokre vassdrag er elvemiljøet såpass dårlig at habitatforbetrande tiltak må gjerast, i tillegg til oppavling og utsetting av elvemusling. I nokre elvar er bestandane så fåtalige og habitatkvaliteten så dårlig at det er usikkert om dei kan bergast.

Dei siste seks åra er det påvist fleire nye bestandar eller gjenoppdaga gamle. I 2017 og 2018 vart det søkt etter elvemusling i nitten elvar i relevante område i Hordaland. Ein ny bestand vart påvist, og tomme skal vart funne i ei elv. Det nye funnen var i Sundfjordelva i Fusa. Undersøkinga indikerer at vi no kjenner dei fleste bestandane i fylket, men vi kan ikkje utelukke at der kan komme til fleire.

Det er gjort inventeringar i Femangerelva og Sundfjordelva i Fusa, og Fjordabekkjen i Fitjar i 2018. Desse bestandane var enten ikkje undersøkt tidlegare, eller tidlegare undersøkingar var ufullstendige. Dei tre bestandane har no fått ein oppdatert status. I dei to elvane i Fusa var det fåtalige bestandar med låg eller manglande rekruttering, medan Fjordabekkjen i Fitjar hadde ein bestand med nokre tusen muslingar, og med litt rekruttering det siste tiåret.

Redokspotensialmålingar kan nyttast til å vurdere habitatkvaliteten til elvemusling. Målingar er utført i seks elvar i Hordaland. Fem av dei utvalde elvane har hatt lite potensiell habitatøydeleggjande aktivitet i nedbørfeltet og viste relativt gode verdiar. Haukåselva, i Bergen kommune, som er utsatt for mange potensielt negative påverknader, viste redokspotensialverdiar som indikerte dårlig habitatkvalitet.

Det er samla inn DNA-prøvar frå ni bestandar av elvemusling i Hordaland i løpet av dei siste sju åra. Prøvar frå vel halvparten av nolevande bestandane i fylket er dermed sikra. Når prøvar frå fleire bestandar er sikra, kan samla analysar av materialet gje verdfull kunnskap for forvaltning og forsking. Kunnskapen om DNA og analysar av dette er i sterkt utvikling, og moglegheitene i framtida er uante. Det er derfor viktig å få sikra prøvar frå flest mogleg bestandar av elvemusling.

Dei kommande åra vil det vere behov for vidare undersøkingar og innsamlingar, for å styrke det faglege grunnlaget for ei god forvaltning av elvemusling i Hordaland. Nokre aktuelle tema er: -inventeringar av bestandar som ikkje er undersøkt på ei stund og/eller der det ikkje er søkt etter unge muslingar i elvebotnen, -vidare sok for å avklare om her kan finnast fleire bestandar med elvemusling, og - innsamling og analysar av DNA frå elvemusling.

## INNLEIING

Elvemuslingen er ein art i tilbakegang i Norge, og derfor raudlista som sårbar. Det står enno verre til for arten i resten av det opprinnelege utbreiingsområdet i Europa. Ein fjerdedel av bestandane og 40 % av individua i Europa lever innanfor Norge sine grenser. Elvemuslingen er derfor ein ansvarsart for Norge. Etter Bern-konvensjonen, har Norge derfor eit spesielt ansvar for arten (Miljødirektoratet 2018).

Om ein skal forvalte ein art er det sentralt å vite kor mange bestandar ein har og kvar desse lever. Grunnleggande kunnskap om bestandsstorleik, bestandsstruktur og utbreiing til bestanden er også viktig. Vidare vil ei avklaring av eventuelle faktorar som påverkar bestanden negativt vere grunnlaget for å sikre bestandane. I denne rapporten, som oppsummerer ulike arbeide vi har gjort i Hordaland i 2018, har vi vore innom desse tre emna.

Vi har no i vel 10 år arbeidd med elvemusling på Vestlandet, og meiner vi har god oversikt over eksisterande bestandar av elvemusling. For å kontrollere kor god denne oversikta over eksisterande bestandar er, har vi i 2017 og 2018 søkt med vasskikkert og snorkla i dykkardrakt i ei rekke elvar og bekkar i området rundt Bjørnafjorden og Dåfjorden i Hordaland.

Vi har også utført inventeringar av elvemuslingbestanden i Femangerelva og Sundfjordelva i Fusafjord, og i Fjordabekkjen i Fitjar. Malen for nasjonal overvakning av elvemusling er nytta og tilpassa desse relativt små vassdraga. Målet med inventeringane er å fastslå status til bestandane.

Eit viktig element i kvaliteten til habitatet til elvemusling er at tilhøva i elvebotnen er gode. Dei minste muslingane som nyleg har sleppt seg av gjellene til vertsfisk er spesielt sårbare for dårlige forhold i elvebotnen. Oksygenforholda i botnsubstratet er viktige, og redokspotensial gjev eit mål på dette. Målinger er gjort i nokre elvar i Hordaland sidan 2014, og data frå målingane vi har gjort er samla i denne rapporten.

Det finst ein del historisk kunnskap om førekommstar av elvemusling i Hordaland i eldre litteratur. Denne er kort oppsummert først i rapporten.

Her er også gjeve ei oversikt over innsamla DNA-prøvar frå bestandar av elvemusling i Hordaland. Analysar av DNA kan vere eit kraftfullt verktøy for å få meir kunnskap om bestandar. Metodane kan mellom anna fastslå slektskap mellom bestandar og sannsynleg verstsart for bestandar. Denne vitenskapen er i sterkt utvikling, og moglegheitene i framtida er uante. Det viktige no er å sikre DNA-prøvar frå elvemuslingbestandar, spesielt frå dei som kan stå i fare for å gå tapt. Om ein ikkje har DNA frå desse bestandane vil ein ikkje kunne få fram kunnskapen som framtidige metodar truleg vil gje oss. Innsamling av DNA frå bestandar av elvemusling er derfor eit prioritert tiltak i handlingsplanen for elvemusling (Miljødirektoratet 2018).

Til slutt oppsummerer vi kunnskapsstatus for elvemusling i Hordaland, og antydar kunnskapsbehovet, slik det var ved utgangen av 2018.

## METODAR

Her er beskrive metodar for overordna vurdering av bestandar av elvemusling. Metodar for søk etter elvemusling, inventering av elvemusling og redokspotensialmålingar er beskrive direkte i kapitla for dei ulike tema.

I ei samla vurdering av «tilstand», «verneverdighet» og «levedyktighet» til bestand av elvemusling tek ein med mål for bestandsstorelek, tettleik, utbreiing og storleksfordeling. Larsen & Hartvigsen (1999) har presentert en modell for slike vurderingar (**tabell 1**). Sjå også Larsen & Karlsen (2010) for eksempel på bruk og spesifiseringar av metoden. Metoden baserar seg på modell for å vurdere verneverdi (Söderberg 1998 og Henrikson mfl. 1998).

**Tabell 1.** Bedømming av verdi for elvemuslingbestandar, etter kriterium og poengklassar (Larsen & Hartvigsen 1999, Larsen & Karlsen 2010, Larsen 2017). Klasse I: Ein bestand er «verneverdig», men er «truga», har «liten levedyktighet» og er sårbar for vidare reduksjon om poengsummen er 6-7 poeng, Klasse II: Ein bestand har «høy verneverdi», men er «sårbar» og er «sannsynleg levedyktig», med behov for vidare tiltak. om poengsummen av dei ulike kriteria er 8-17, Klasse III: Bestanden har «meget høy verneverdi» og er «levedyktig» om poengsummen er 18-36.

Kriterium	1p	2p	3p	4p	5p	6p
Bestandsstorleik (i tusen)	<5	5-10	11-50	51-100	101-200	>200
Gjennomsnittstettleik (ind/m <sup>2</sup> )	<2	2,1-4	4,1-6	6,1-8	8,1-10	>10
Utbreiing (km)	<2	2,1-4	4,1-6	6,1-8	8,1-10	>10
Minste musling funne (mm)	>50	41-50	31-40	21-30	11-20	<11
Andel muslingar < 2 cm (%)	>0-1	>1-2	>2-3	>3-4	>4-5	>5
Andel muslingar < 5 cm (%)	>0-5	6-10	11-15	16-20	21-25	>25

Ein variant av denne vurderinga av status og levedyktigkeit finn ein i Naturindeks (**tabell 2**). Her er det storleik til bestand og andel kortare enn 50 mm og 20 mm som er kriteria for klassifisering.

**Tabell 2.** Statusbedømming og levedyktigkeit for elvemusling, med tilhøyrande indikatorverdi, etter naturindeks (<http://www.naturindeks.no/Indicators/elvemusling>). Tabellen er henta frå: Miljødirektoratet (2018).

Klasse	Indikator-verdi	Status
1	1	Mer enn 10 % <50 mm og noen av disse <20 mm, stor populasjon; livskraftig.
2	0,8	Noen <50 mm og noen av disse <20 mm; livskraftig?
3	0,6	Noen <50 mm; ikke livskraftig.
4	0,4	Alle >50 mm, moderat/stor populasjon (>500 ind.); utdøende.
5	0,2	Alle >50 mm, liten populasjon (<500 ind.); snart forsvunnet.
6	0	Dokumentert forekomst som har forsvunnet; utdødd.

I nokre tilfelle har vi erfart at vurderingskriteria, slik dei no er utforma, kan gje uventa og misvisande konklusjonar. Dette vil truleg bli betre når indeksane har fått lengre fartstid, og har blitt korrigert på basis av erfaringar. Det er uansett viktig å vurdere grunndata bak indekseringa for å vurdere om statusbedømminga er fornuftig.

**Datagrunnlaget** er betre di grundigare undersøkinga er gjort i forhold til elvestorleik og kor mange kriterium ein har gode mål for. Det er vurdert som «godt» om ein har sikre data på alle kriterium, «middels godt» om konklusjonane er relativt sikre basert på tilgjengelege data eller «mangelfullt» om det er meir usikkert om konklusjonane er rette.

Kjende krav til livsmiljø for elvemusling er samanfatta av Degerman mfl. (2009) (**tabell 3**). Her er ein del vasskjemiske mål teke med, men også grenser for redokspotensial, andel finkorna i substratet og tettleik av vertsfisk. Verdiar frå denne samanfatninga er nyttig i vurderinga av livsmiljøet i nokre av dei omtala elvane. Grense for kalsium kunne vore nyttig, med tanke på bestandar på Vestlandet. Her er den normale vasskvaliteten kalkfattig, men behovet elvemusling har for kalsium i vatnet er ikkje avklart.

**Tabell 3.** Elvemusing sine krav til livsmiljø, samanfatta av Degerman mfl. (2009).

## Boks 1

### Elvemuslingens krav til livsmiljø (Degerman mfl. 2009)

Musslor vill ha strömmande vatten av bra vattenkvalitet, stabila bottnar med lämpligt material, god vattenomsättning i substratet och god tillgång till värdfisk. Med dagens kunskap föreslås följande riktlinjer för skandinaviska vatten:

pH ≥6,2	(minvärde)
Inorganiskt aluminium <30 µg/l	(maxvärde)
Totalfosfor <10 µg/l	(medelvärde)
Nitrat <125 µg/l	(medianvärde)
Turbiditet <1 FNU	(medelvärde, vårflood)
Färgtal <80 mg Pt/l	(medelvärde, vårflood)
Vattentemperatur <25 °C	(maxvärde)
Finkornigt (<1 mm) substrat <25 procent	(andel av partiklar, maxvärde)
Redoxpotential >300 mV	(korrigerat värde)
Antal laxfiskungar ≥ 5 per 100 m <sup>2</sup>	(minvärde, sommar)

# HISTORISK KJENTE FØREKOMSTAR AV ELVEMUSLING I HORDALAND

Etter ein gjennomgang av litteraturen er den dokumenterte kunnskapen om førekomenst av elvemusling i Hordaland fram til år 2000 oppsummert (**tabell 4**). Vi veit at det mange stader likevel har funnest lokal kjennskap til bestandar av elvemusling, som ikkje har vore kjent av offentleg forvaltning, forskingsmiljøet eller museum.

Dei første skriftelege kjelder vi kjenner til om elvemusling i Hordaland er frå tingbøker der saker om ulovleg perlefiske var tatt opp (oppsummert av Hanssen 1929 & Johannessen 2003). Her er Haukåselva og Storelven (Arnaelva) i Bergen, Mjåtvitelva i Meland og Oselva i Os nemnt.

Arna og Oselva er også omtalt i «Norges land og folk» (Vibe 1896, Helland 1921). Her er også nemnt Søftelandsbæk og Kuvenelva i Osvassdraget. Videre er Loneelv, Nesttunelv og Etneelv nemnt. Krüger (1820) og Kraft (1830) (**figur 2, tabell 4**) nemner førekomenst av musling i Oselva tidleg på 1800-talet.

Kleiven & Dolmen (2013) refererer skrifter etter J. O. Simonsnæs frå rundt 1900 der Fanaelven, Espelandselven (Arnaelva), Oselven og Aalandselven (ukjent elv) er nemnt. Dette er elvar i Søndre Bergenhus amt, som tilsvrar det som seinare vart Hordaland fylke. Taranger (1889) omtaler perlefangst i Oselva frå om lag same tida.


Dei ovanfor omtalte elvar og vassdrag er dei åtte i Hordaland som er omtalt i litteraturen og som var kjent før ca. år 1900. Dette er: Oselva med Kuvenelva/Baronselva og Søftelandselva i Os og Bergen kommunar, Arnaelva, Nesttunelva og Haukåselva i Bergen kommune, Mjåtvitelva i Meland kommune, Loneelva i Osterøy kommune, Etneelva i Etne kommune og Aalandselven, som vi ikkje kjenner plasseringa til, men som skal ligge i Hordaland (**tabell 4**). Dei fleste av desse elvar/vassdrag er også omtalt seinare i litteraturen. I fem av desse er det framleis liv i 2018, medan tre bestandar er antattapt.

I løpet av 1900-talet kom det til sju elvar. Dette var: Åreidelva i Bømlo kommune, Hopselva og Fossåa i Fusa kommune, Ljoneselva i Kvam herad, elv frå Bjørnavatnet og bekk Særvoll i Os kommune og Skjelåna i Samnanger kommune (**tabell 4**). I fire av desse elvane var det framleis levande musing i 2018, medan tre er antattapt.

Etter år 2000 har det komme informasjon om sju elvar der det lever elvemusling. Dette er: Apalvågelva, (Fjell kommune), Femangerelva og Sundfjordelva (Fusa kommune), Kvernavikselva (Tysnes kommune), Fjordabekkjen (Fitjar kommune), Døsjaelva (Os kommune) og Rørvikelva (Kvam herad) (Kålås 2012, Kålås 2015, Kålås 2016, denne rapporten) (**figur 1**). Det har også komme inn melding og fire elvar der det skal ha vore elvemusling, men der den mest sannsynleg er tapt. Dette er: Apeltunelva (Bergen kommune) (Lars Skjold, Pers. medd., som såg mykje elvemusling i elva ca. 1970-73, og sist såg ein musling i elva eit av dei første åra på 2000-talet), Fosseelva (Meland kommune) (Arnt Brakstad pers. medd., såg musling sist 2006), Reisoelva (Tysnes kommune) (Pers. medd. Audun Inge Fosshagen, biolog og tidlegare forskar ved Universitetet i Bergen, som vart bede å sjå på skjell i Reisoelva, som vart funne ved UTM 32 V 305730 6658067, og som kunne bekrefte at dette var elvemusling, tidspunkt ukjent men må ha vore før 2010), Sørelva ved Skjelbreid (Fusa kommune) (Pers. medd. Geir Ragnhildstveit som såg elvemusling på syttitalet, og eigen obs. av tomme skjell i elva 8. juni 2018).

I tillegg veit vi at elvemusling vart flytta frå Loneelva til Kossdalselva på Osterøy (UTM 32V307806 6718961) i løpet av 1970-talet. Det er ukjend kor mange som vart flytta, og han som utførte flyttinga lever ikkje lenger, så dette vil forblia ukjent (Thor Moe Lønning, Pers. medd.). Vi gjorde eit søk etter elvemusling i elva i oktober 2017, men ingen muslingar vart då observert (Kålås 2018). Muslingane som vart flytta er dermed sannsynlegvis døde utan at dei har fått fram avkom som har overlevd.

Totalt har vi informasjon om 27 elvar/vassdrag i Hordaland der det er eller har vore elvemusling. Av desse er det enno levande muslingar i 16 elvar/vassdrag, medan status er sikkert tapt eller ukjent/uavklart for elleve. Då er ikkje den innførte førekomensten i Kossdalen på Osterøy teken med.



**Figur 1.** Kart som viser historisk kunnskapsstatus for elvemusling i Hordaland. Siklar viser plassering til elvemuslingbestandar og kva epoke dei vart dokumentert i litteraturen. Ei elv, Aalandselva, i Søndre Bergenhus, som er kjend frå litteraturen (Kleiven og Dolmen 2013), har ukjent lokalisering, og er derfor ikkje med på kartet.

**Tabell 4:** Dokumentasjon om elvemusling i Hordaland fram til 2000. BM = Bergen Museum. Namn brukt på lokalitet er den som er brukt i litteraturen det er vist til. K & D 2013 er Kleiven & Dolmen (2013).

Lokalitet	komune	kjelde	tidfesta til
Houchaas elv/Hylchies elv	Bergen	Johannessen 2003	1721
Haukåsvassdraget		Kambestad mfl. 1995	Skjel 1931 BM
Haukåselva		Bjordal 2002	Gjennom 1900-talet
Espeland – truleg Storelva, Arna	Bergen	Johannessen 2003	1722
Storelven, Arna		Vibe 1896	Slutten 1800-talet
Espelandselven		Simonnaes i K&D 2013	Rundt 1900
Nesttunelv	Bergen	Vibe 1896	Slutten 1800-talet
Nesttunelv		Økland & Økland 1998	Skjel 1950 BM
Fanaelven	Bergen	Simonnaes i K & D 2013	Rundt 1900
Åreidelva	Bømlo	Dolmen & Kleiven 1997	1994
Etneelven (Nordelva og Sørelva)	Etne	Vibe 1896	Slutten 1800-talet
Etneelven (Nordelva og Sørelva)		Helland 1921	Rundt 1900
Etneelva		Dolmen & Kleiven 1997	Ukjent år
Etneelva		Økland & Økland 1998	1976-77
Etneelva (Sørelva)		Larsen 2005	1940-50talet
Hopselva	Fusa	Økland & Økland 1998	1976
Fossåa	Fusa	Dolmen & Kleiven 1997	Rundt 1990
Fossåa		Økland & Økland 1998	1982
Ljoneselva	Kvam	Dolmen & Kleiven 1997	Ukjent
Frekhaugelven/Mjåtveitelva	Meland	Johannessen 2003	1720
Mjåtveitelva		Dolmen & Kleiven 1997	Rundt 1990
Oselvi	Os	Hanssen 1929	1723
Kuvenelven - Osvassdraget		Vibe 1896	1743
Baronselva (=Kuvenelva)		Krüger 1820	1817
Ous elv		Kraft 1830	tidleg 1800-talet
Oselven ved Bergen		Taranger 1889	Slutten 1800-talet
Oselven		Vibe 1896	Slutten 1800-talet
Søftelandsbæk - Osvassdraget		Vibe 1896	Slutten 1800-talet
Oselven		Simonnaes i K&D 2013	Rundt 1900
Oselven		Helland 1921	Rundt 1900
Valleelvi		Hanssen 1920	1910
Oselvi		Hanssen 1920	Ca. 1920
Renen		Myking 1994	Ca. 1980
Nordelva/Raudlistraumen		Myking 1994	1985
Oselva		Dolmen & Kleiven 1997	Rundt 1990
Oselva		Myking 1994	Tidleg 1990-talet
Søftelandselva		Myking 1994	Tidleg 1990-talet
Bjørnavatnet	Os	Økland & Økland 1998	Skjel 1954 BM.
Bjørnevatnet		Myking 1994	1973-74
Bekk Særvoll	Os	Hanssen 1920	Ca 1920
Gjerstadvassdraget (Loneelva)	Osterøy	Vibe 1896	Slutten 1800-talet
Loneelven		Helland 1921	Rundt 1900
Loneelvi		Økland & Økland 1998	Skjel 1977 BM
Fitje-Låstad-Kleppe		Dolmen & Kleiven 1997	Ukjent år
Skjelåelva	Samnanger	Dolmen & Kleiven 1997	1992
Aalandselven	Ukjent	Simonnaes i K & D 2013	Rundt 1900

I 1994 vart det sendt ut ei spørjeundersøking til kommunar på Vestlandet om førekomst av ulike artar ferskvassfisk (Lura og Kålås 1994). Det var her også spurt om førekomst av ferskvasskreps og elvemusling, men dette er ikkje publisert i rapporten frå spørjeundersøkinga. Det kom tilbakemelding

frå 27 av 33 kommunar i Hordaland. Status var då at den kommunale miljøforvaltninga kjende til seks eksisterande bestandar, og ein tapt bestand. Dei eksisterande var ein i Bømlo kommune (Åreidelva), to i Fusa (truleg Fossåa og Hopselva), ein i Meland kommune (Mjåtveitvelva), ein i Os kommune (Oselva) og ein i Samnanger kommune (truleg Skjelåna). Tapt bestand var meldt frå Kvam herad (Ljoneselva).

Dette viser at kunnskapen om elvemusling i den lokale naturforvaltninga var mangelfull midten av 1990-talet, sidan berre seks førekommstar var kjent. Dolmen & Kleiven (1997) gjorde ei nasjonal oppsummering omtrent på same tida ei nasjonal samanstilling av kunnskapen om elvemusling i Norge, og lista då opp elleve elvar eller vassdrag som hadde eller hadde hatt elvemusling. På denne tida var strategien til den nasjonale forvaltninga at kunnskap om førekommst av elvemusling ikkje skulle vere offentleg, for å unngå at folk skulle oppsøke desse på jakt etter perler. Vi veit no at arten fanst i minst 16 elvar eller vassdrag i Hordaland på 1990-talet.

Elves og Ferskvandsfisket er fun paa faa Steder af nogen Wigtighed. Dog falder i nogle Elve Laxefiskerie. Saaledes er den igjennem Etne Præstegjeld labende Elv befjendt af sit Laxefiskerie. Ogsaa faaes Lax i Ous:Elven i Ous Præstegjeld, hvor den tages med Kar, samt i nogle Elve i Qvindherreds Præstegjeld i Kjær, der er et Slags Ruster. Desuden gaaer Lazen i to af Kinshavigs Præstegjelds Elve to til fire tusinde Alen op, og fanges der ved nogle Gaarde. I Ous Præstegjeld og andensteds ere fiskrige Ferskvande, hvori faaes Øret, Rør, Hvidugge og lidt Aal, ligesom i Elvene faaes Øret. Inde i de til Gravens og Kinshavigs Præstegjelde grændsende Østjelde ere mange Ferskvande, som ogsaa tildeels ere fiskrige. Dog indeholde de fun Ørret, der blot fanges af Reensdyr. Skyttere og Sæterfolkene, medens de om Sommeren ligge i fjeldene. I foransorte Ous:Elv er fundet Perler af ikke ubetydelig Værdie; ligesaa er i en lidet Aae strax bag Ous Præstegaard fundet Perlemuslinger.

Figur 2. Eksempel på eldre tiders litteratur om musling. Her fra Kraft 1830, om perlemusling i Ous Elv (Oselva i noverande Os kommune).

## SØK ETTER ELVEMUSLING I ELVAR RUNDT DÅFJORDEN OG BJØRNNAFJORDEN I 2017 OG 2018

Om ein skal forvalte ein art på ein god måte må ein kjenne til utbreiinga av arten. Vår oversikt over førekomstar av elvemusling i Hordaland viste ved utgangen av 2017 at sju av femten vassdrag med elvemusling i Hordaland låg i området rundt Bjørnafjorden. Dette ser derfor ut til å vere området der det er tettast med elvemusling i Hordaland. I dette området i kommunane Bergen, Os, Samnanger og Fusa, ligg det ei rekke elvar og bekkar som potensielt kan vere leveområde for elvemusling. Vi har også fått inn melding om at fleire elvar/bekkar til Dåfjorden i Fitjar og Stord kunne ha elvemusling (Kålås mfl. 1995). Frå før er det kjent at elvemuslingen finst i Fjordabekkjen inst i Dåfjorden.

For å undersøke kor god oversikt vi hadde over førekomstane av elvemusling i Hordaland vart eit utval bekkar og elvar i området rundt Bjørnafjorden, og alle bekkar til Dåfjorden, undersøkt i løpet av 2017 og 2018 (**figur 3, tabell 5**). Bekkar og elvar rundt Bjørnafjorden der det mest sannsynleg kunne finnast elvemusling vart plukka ut basert på informasjon om morfologi, vasskvalitet, omtalar i eldre litteratur osv.



**Figur 3.** Elvar som vart gjennomsøkt etter elvemusling i 2017 og 2018. Sjå også **tabell 5**.

## METODE

Fleire metodar kan nyttast for å søke etter elvemusling. Den opprinnelige metoden er visuelt sok i elvestrengen. Til dette trengs ein vasskikkert, ein god rygg og godt tolmod. I bekkar og små elvar ved låg vassføring kan eit slikt sok gje god oversikt over om det finst elvemusling i vassdraget. Ein vil med denne metoden ikkje oppdage elvemusling som ligg nedgravd i elvebotnen, men i bestandar med vaksne musling vil normalt ein høg andel synast frå overflata. Om elvane er store og djupe må ein skifte ut vasskikkerten med dykkardrakt, maske og snorkel. Likevel vil sannsynlegheita for å påvise musling bli redusert når elvane vert store og djupe, og arbeidet blir tidkrevjande.

Eit alternativ til visuelt sok er å heller leite etter larvar av elvemusling på gjellene til vertsfisk. Dette er prøvd i mange elvar i Hordaland og Sogn & Fjordane. Metoden har synt seg svært potent, ved at vi om våren finn larvar på gjeller til ungfish sjølv der bestandane er svært fåtalige. Fordelen med metoden er at den er langt mindre tidkrevjande i felt enn manuelle sok gjennom heile elva. Metoden er likevel ikkje sikker, sidan vi fleire stader har opplevd å ikkje finne muslinglarver på gjellene til ungfish der vi observerer vaksne muslingar (eigne upubliserte data). Metoden er nytta mange stader på Vestlandet sidan 2007 (Kålås 2008, Kålås & Larsen 2012).

Den mest moderne metoden for sok etter elvemusling er ved å analysere for miljø-DNA i vassprøvar frå elvar og vassdrag. Miljø-DNA er DNA-fragment som individ slepper frå seg. Om ein filtrerer vassprøver vil slike DNA fragment samlast opp og påvisast ved analyse (Fossøy mfl. 2017). Tidlegare måtte tettleiken av elvemusling vere høg og avstand til elvemusling vere kort om ein skulle påvise denne (Stoeckle mfl. 2015), men metoden har dei siste åra vorte mykje meir følsam. Denne metoden er eit alternativ til dei tradisjonelle metodane. Om metoden med miljø-DNA er så god, som førebelse resultat tyder på, vil den vere eit kraftfullt verktøy i arbeidet med å avklare om vassdraget har bestandar av elvemusling.

I 2017 og 2018 vart den tradisjonelle metoden med visuelt sok nytta. Ved slike sok er det viktig for kvaliteten at vassføringa er svært låg. Planen var at sokka skulle utførast i 2017, men vedvarande høg vassføring gjennom sommaren 2017, grunna mykje regn, gjorde at det meste av arbeidet måtte utsetjast til 2018. Sommaren 2018 var det svært låg vassføring i dei fleste vassdrag på Vestlandet, og tilhøva for arbeidet var uvanleg gode.

I dei minste elvar og bekkar vart det meste av område i bekkar og elvar som kunne vere leveområde for elvemusling undersøkt gjennom vasskikkert. I dei større elvane, Sørelva og Koldalselva i Fusafjorden og Fanaelven i Bergen, vart det nytta dykkardrakt, maske og snorkel ved undersøkinga. Posisjonen til eventuelle elvemuslingar vart registrert med GPS. Staden vi sokte frå og til vart også registrert og er vist i **tabell 5**. Lokalitetane som ligg i kommunane Fitjar og Stord er lokalitetane til Dåfjorden, medan dei andre lokalitetane ligg i området rundt Bjørnafjorden. Informasjon om Tinnselva, Rundehaugstjørno og Longavassbekken som alle renn til Dåfjorden er henta frå notat utarbeidd for Statens vegvesen (Kålås 2017).

**Tabell 5.** Bekkar til Dåfjorden (Fitjar- og Stord kommunar) og området rundt Bjørnafjorden som vart undersøkt med vasskikkert sommaren 2017 og 2018.

Elv/bekk	Kommune	dato	Posisjon fra	Posisjon til
Bekk frå Vegslitjørna	Fitjar	29.09.17	32 V 295461 6639585	32 V 295746 6639704
Frå Rundehaugtjørna	Fitjar	29.09.17	32 V 295715 6638924	32 V 296006 6639156
Tinnselva	Fitjar/Stord	29.09.17	32 V 295892 6638281	32 V 296688 6638822
Bekk frå Langavatnet	Stord	29.09.17	32 V 295679 6637588	32 V 296243 6637105
Petarteigselva	Stord	29.09.17	32 V 295989 6635690	32 V 296640 6635330
Longavassbekken	Fitjar	29.09.17	32 V 295366 6638307	32 V 295117 6638602
Bergabergbekken	Fitjar	21.08.18	32 V 295244 6637452	32 V 295130 6637683
Kvednabekken	Fitjar	21.08.18	32 V 295135 6637079	32 V 294993 6637464
Fanaelven	Bergen	25.05.18	32 V 297387 6685819	32 V 298789 6686437
Sundfjordelva	Fusa	07.06.18	32 V 321211 6661439	32 V 320680 6660692
Sørelva	Fusa	08.06.18	32 V 322698 6682694	32 V 323058 6682666
Koldalselva	Fusa	08.06.18	32 V 320367 6683023	32 V 320884 6683060
Ådlandselva	Fusa	08.06.18	32 V 316559 6687268	32 V 317333 6688438
Ådlandselva	Samnanger	08.06.18	32 V 318869 6700275	32 V 318432 6700088
Nordvikselva	Os	19.07.18	32 V 298540 6682751	32 V 298636 6683190
Sagvikselva	Os	19.07.18	32 V 298712 6682414	32 V 299080 6682601
Innlaup Pøyla	Os	19.07.18	32 V 300095 6681722	32 V 300111 6681794
Sjøbølvelva	Os	19.07.18	32 V 299974 6681400	32 V 300089 6681384
Sørvikselva	Os	19.07.18	32 V 299748 6680302	32 V 299900 6680198

## RESULTAT

### ELVAR OG BEKKAR RUNDT DÅFJORDEN

Det er kjent ein bestand av elvemusling i Fjordabekkjen, som renn inn heilt nord i Dåfjorden (32V 295408 6639684). Denne bestanden vart gjenoppdagd 23. mars 2013 (av L. Nathalie Jurs og Bjørnar Løkstad), vart enkelt undersøkt same år av Steinar Kålås og Magnus Johan Steinsvåg og er grundigare inventert i 2018 (sjå lengre bak i denne rapporten). Dei andre elvane/bekkane som renn til Dåfjorden og som er så store at der kunne vere leveområde for elvemusling er:

#### Bekk inn og ut av Vegslitjørna

Dette er små bekkar med eit nedbørfelt som er så lite at elva kan være nær tørr eller tørr i periodar med lite nedbør. Siste biten mot sjøen fell elva bratt, og det er ikkje råd for fisk å vandre opp frå sjøen. Elvebotnen til inn- og utlaup vart undersøkt med vasskikkert, men elvemuslingar vart ikkje observert ved undersøkinga 26. september 2017.

To vassprøvar tekne i utlaupet av Vegslitjørna i 1995 viste surleikar på pH 6 og 6,4 (Kålås mfl. 1996).

#### Bekk frå Rundehaugtjørna

Nedbørfeltet til bekken nedstraums Rundehaugstjørno er lite, og bekken er truleg tørr eller nær tørr i tørre periodar. Her er likevel enkelte djupe hølar med eigna substrat for elvemusling. Desse vart sjekka ved observasjon gjennom vasskikkert 26. september 2017, men ingen funn av levande musling eller muslingskal vart gjort. Bekken fell bratt siste stykket mot sjøen og fisk kan ikkje vandre opp. Vassprøvar tekne i elva i 1995 viste surleiksverdiar mellom pH 5,2 og 5,8 (Kålås mfl. 1996). Om desse vassprøvane er representative er dette surt for å vere eigna leveområde for elvemusling (Degerman mfl. 2009). Forsuringa har minka mykje etter 1995 i Sør Norge, etter ein periode på 30-40 år der forsuringa prega vassdrag i Sør-Norge.

## Tinnselva

Tinnselva er 8-10 m brei og hadde full vassdekning då den vart undersøkt 29. september 2017. Det er nokre større hølar i elva, og fossar nedstraums både Stemmetjødna og Røytetjørna. Store delar av elvebotnen er fast fjell, og substrat av stor stein og blokk dominerer elles. Tilgjengelege delar av elvebotnen til Tinnselva frå sjøen og opp til Stemmetjørna vart undersøkt gjennom vasskikkert 26. september 2017. Det vart ikkje observert elvemusling, og dette var ikkje uventa sidan elva frå Stemmetjødna og til sjøen har ueigna habitat for elvemusling.

Sideelva som kjem inn i Tinnselva frå nord like nedstraums vegbrua, vart også undersøkt. Denne hadde eit meir finkorna substrat, men elva er lita, tørkar truleg ut i tørre periodar og har heller ikkje eigna habitat for elvemusling.

Ei elvestrekning på 100 m frå Stemmetjørn og oppover vart også undersøkt. Elvebotnen såg heller ikkje her ut til å vere eigna for elvemusling og der vart ikkje observert levande elvemusling eller skal av elvemusling.

Fire vassprøvar tekne i 1995 viste surleik melom pH 6,1 og 6,8 i Tinnselva (Kålås mfl. 1996). Dette er godt innanfor kravet til godt livsmiljø for elvemusling med omsyn på surleik (Degerman mfl. 2009). Det er også lite næring og partikkeltiforsler til vassdraget, så vasskvaliteten skulle vere god nok for elvemusling, men habitattilhøva elles ser ut til å vere ueigna.

## Bekk frå Langavatnet

Elva renn nedst bratt ned i sjøen over sva, og her er ikkje mogleg for fisk å vandre opp frå sjøen. Oppstraums svaet er ei lang flat elvestrekning med sand- og grusbotn opp til ca. 400 m frå sjøen, som ser veleigna ut som leveområde for elvemusling (til UTM 32 V 295986 6637430). Ovanfor dette området og opp til hovudvegen er bekken brattare med grovare substrat. Oppom vegen går bekken mest gjennom myr og sump. Partia av elva som såg ut til å vere eigna for elvemusling, vart undersøkt gjennom vasskikkert 26. september 2017, men verken levande elvemusling eller skal av elvemusling vart observert.

Fire vassprøvar vart i 1995 tekne i utløpet frå Langavatnet og Ellingdalsvatnet, som er kjeldene til bekken frå Langavatnet. Desse viste surleikar mellom pH 5,3 og 5,9 (Johnsen mfl. 1996), som er litt surt for elvemusling.

## Petarteigselva/Rutleelva

Elva var 3-5 m brei og hadde nær full vassdekning då den vart undersøkt. Den var oversiktleg, hadde sand og grusbotn og det var lett å søke med god kvalitet over elvebotnen. Elva vart undersøkt om lag frå flomålet og vel 700 m oppover gjennom vasskikkert. Fleire parti av elva stod fram som veleigna for elvemusling, men ingen levande muslingar eller skal vart observert 26. september 2017.

Elva har to greiner, ei frå Petarteigsvatna og ei frå Rutletjørna, som renn saman ca. 100 m oppstraums utløp til sjø. Petarteigsvatna blir brukt som vasskjelde for smoltanlegg. Det er råd for fisk frå sjøen å vandre langt oppover elva mot Rutletjørna. I delen av elva det vart søkt i var elva fleire stader forbygd. Den vart etter kvart litt brattare, fekk grovare botnsubstrat og rann i små stryk. To vassprøvar tekne i utlaupet av Petarteigselva i 1995 viste surleikar på pH 5,5 og 6,5 (Johnsen mfl. 1996). I rapport om undersøking av vassdrag i Hordaland for *Gyrodactylus salaris* (Grøndahl & Vasshaug 1990) står det at elva vart rotenonbehandla grunna fiskesjukdom hausten 1989, men årsaka til rotenonbehandlinga var at ein ville fjerne den innførte fiskearten abbor (*Perca fluviatilis*) frå Stokketjørna (Lura & Kålås 1994), som har felles utlaup til sjø med Petarteigselva.

### **Longavassbekken**

Longavassbekken er ein 0,5-1 m brei bekk som renn frå Longavatnet og ut i vestsida av Dåfjorden. Store delar av bekken går gjennom myr. Øvst var botnen av organisk materiale, men nedanfor dette er strekningar med sand og grusbotn før den renn bratt over grovare substrat siste stykket ned i sjøen. Elvebotnen vart undersøkt gjennom vasskikkert frå Longavatnet og ned til sjøen 26. september 2017 utan at det vart observert elvemusling eller skal av elvemusling. Delar av elvestrekninga hadde habitat som kunne vere eigna for elvemusling.

Målingar av surleik frå 1995 viste pH 5,9 og 6,4 (Kålås mfl. 1996).

### **Bergabergbekken**

Bergabergbekken var 0,5 til 1 m brei. Elvebotnen bestod mest av organisk materiale gjennom myrområda, men hadde grovare substrat av stein der det var stryk. I enkelte djupe hølar var det sand og grusbotn, og her kunne det vere leveområde for elvemusling. Ingen vart observert ved søk over elvebotnen gjennom vasskikkert 21. august 2018.

### **Kvednabekken**

Kvednabekken renn frå Stokkavatnet og ut i sjøen på vestsida av Dåfjorden. Den var 0,5 til 1 m brei og vassføringa var låg til middels høg då den vart undersøkt 21. august 2018. Elvebotnen bestod mest av organisk materiale der elva rann gjennom myrområda, men hadde grovare substrat av stein der det var brattare. Siste stykket renn elva bratt ned i fjorden, og fisk frå sjøen kan ikkje vandre opp i vassdraget. I enkelte djupe hølar var det sand og grusbotn, og her kunne det vere leveområde for elvemusling, men ingen vart observert gjennom vasskikkert 21. august 2018.

Målingar av surleik frå 1995 viste pH 5,7 og 6,0 (Kålås mfl. 1996).



**Figur 4.** Parti av Sundfjordelva 20. juli 2018.

## **OMRÅDET RUNDT BJØRNAFJORDEN**

### **Fanaelven**

Fanaelven, frå demningen i utløpet frå Klokkarvatnet til siste foss før sjøen, vart undersøkt ved at ein person, iført dykkardrakt og med maske og snorkel, observerte elvebotnen 25. mai 2018. Det var pent vær, låg vassføring og gode lysforhold då undersøkinga vart gjennomført, og tilhøva for undersøkinga var optimale. Elva var relativt grunn øvst i øvste delen, men meir trauforma og lenger nede. Den renn gjennom skog og myr og ser urørt ut i lange parti, men er forbygd og utretta andre stader. Elva har lange parti med substrat som ser ut til å vere eigna for elvemusling, men ingen vart observert. I nedre delar var elvebotnen dekka av algevekst.

### **Sundfjordelva**

Elvebotnen i Sundfjordelva i Fusa (**figur 4, figur 17**) vart undersøkt, frå oppstraums det omlag 100 m bratte partiet nedst mot sjøen og 1 km oppover, gjennom vasskikkert, 7. juni 2018. Det vart observert om lag 25 levande elvemuslinger og om lag 25 tomme skal midtvegs på denne elvestrekninga. Elva har grovt substrat øvst og nedst. Gjennom myrområda er botnsubstratet mest bløtt med høgt innhald av organisk materiale i nedre delar, medan substratet er fastare lenger oppe. Her er parti med substrat som er godt eigna for elvemusling. Denne førekomensten av elvemusling vart grundigare undersøkt i juli 2018 (sjå lenger bak i denne rapporten).

### **Sørelva**

Sørelva i Fusa, som renn frå Vengsvatnet til Skjelbreidvatnet vart undersøkt ved at ein person, iført dykkardrakt og med maske og snorkel, observerte elvebotnen 8. juni 2018. Det var pent vær, låg vassføring og gode lysforhold då undersøkinga vart gjennomført, og tilhøva for undersøkinga var optimale. Elva varierer mellom større hølar og strykstrekningar over stein og sva. Hølane har ein botn som er ei blanding av mineralsk og organisk materiale, og lauv og greiner er oppsamla på stillare parti. Hølane ser ut til å kunne vere eigna habitat for elvemusling. I ein av hølane vart det observert tre gamle skal av elvemusling. Desse kan ha vore døde i minst ti år. Elles vart det observert aure og ål i elva.

### **Koldalselva**

Koldalselva i Fusa, som renn frå Skjelbreidvatnet og ut i Eikelandsosen, vart undersøkt ved at ein person iført dykkardrakt og med maske og snorkel observerte elvebotnen 8. juni 2018. Det var pent vær, låg vassføring og gode lysforhold då undersøkinga vart gjennomført, og tilhøva for undersøkinga var optimale. Her var mange fine hølar i elva med eigna substrat for elvemusling, men ingen vart observert.

### **Ådlandselva i Fusa**

Elvebotnen til Ådlandselva i Fusa vart undersøkt ved observasjon gjennom vasskikkert 8. juni 2018. Den nedste vel 1 km lange strekninga av elva renn bratt ned mot fjorden. Oppom dette er ein vel 1 km lang elvestrekning som er relativt flat. Oppom denne stig elva så brattare opp Sør dalen. Det var det midtste flate partiet som vart undersøkt. Det var pent vær, låg vassføring og gode lysforhold då undersøkinga vart gjennomført, og tilhøva for undersøkinga var optimale. Elvebotnen går mange stader over fjell, men i hølar og rolegare parti av elva har den eit substrat som er ei blanding av organisk og mineralsk materiale. Her såg det ut til å vere eigna habitat for elvemusling, men ingen elvemusling eller muslingskal vart observert ved undersøkinga.

### **Ådlandselva i Samnanger**

Elvebotnen til Ådlandselva i Samanger vart undersøkt gjennom vasskikkert 8. juni 2018. Den undersøkte strekninga var om lag 1 km lang frå fjorden og oppover vassdraget til der den går brattare oppover i terrenget. Det var pent vær, låg vassføring og gode lysforhold då undersøkinga vart gjennomført, og tilhøva for undersøkinga var optimale. Elva var tydeleg påverka av store næringstilførsler nedst, men såg rein ut oppom områda der det var dyrka mark på begge sider. Det var mykje flat stein og lite groe på elvebotnen. Det vart ikkje observert elvemusling eller skal av slike i elva.

## **Nordvikselva**

Elvebotnen til Nordvikselva i Os kommune vart undersøkt gjennom vasskikkert 19. juli 2018. Den undersøkte elvestrekninga var vel 400 m lang, og starta frå sjøen. Det var låg vassføring, men likevel tilstrekkeleg vassdekning for at elvemusling kunne leve i elva. Substratet var relativt grovt. Det vart ikkje funne elvemusling eller skal av slike i elva.

## **Sagvikselva**

Elvebotnen til Sagvikselva i Os kommune vart undersøkt gjennom vasskikkert 19. juli 2018. Den undersøkte elvestrekninga var om lag 400 m lang, starta ved sjøen og enda litt oppom skulen. Det var låg vassføring og elva var nær tørr mange stader. Det vart ikkje funne elvemusling eller skal av slike i elva.

## **Innlaup Pøyla**

Elvebotnen til Pøyla ved Lysekloster i Os kommune vart undersøkt gjennom vasskikkert 19. juli 2018. Den undersøkte elvestrekninga var om lag 100 m lang og starta frå Pøyla. Botnsubstratet var mørkt, grovt og mosegrodd, og vassføring i elva var låg. Det vart ikkje funne elvemusling eller skal av slike i elva.

## **Sjøbøelva**

Elvebotnen til Sjøbøelva i Os kommune vart undersøkt gjennom vasskikkert 19. juli 2018. Den undersøkte elvestrekninga var vel 100 m lang og starta frå sjøen og gjekk opp til vandringshinderet for fisk. Det var låg vassføring og vassdekning i elva då den vart undersøkt. Elva hadde finkorna substrat, tett fast botn og få eller ingen skjulestader. Om der hadde vore elvemusling i elva ville desse vore lette å finne, men det vart verken funne elvemusling eller skal av slike i elva.

## **Sørvikselva**

Elvebotnen til Sørvikselva i Os kommune vart undersøkt gjennom vasskikkert 19. juli 2018. Elva renn frå Sørvikvatnet, som er drikkevasskjelde, og til sjøen. Elva renn gjennom eit tett gammalt granplantefelt. Den undersøkte elvestrekninga var nær 200 m lang og starta der elva flatar ut oppom sjøen. Elva hadde botn av sand og grus, men dette var dekka av mudder og rustslam, og elva såg ikkje eigna ut som leveområde for elvemusling. Grunna den tette skogen var det mørkt i elva, og vanskeleg å observere. Det vart ikkje funne elvemusling eller skal av elvemusling i elva.

Vikaelva (32V374257 6918775) som ligg i same området som dei føregåande elvar vart også vurdert undersøkt, men denne var nær tørr, og svært bratt i nedre delar.

Det er framleis andre elvar att i Bjørnafjordenområdet som kunne vore undersøkt nærmare, men det var ikkje tid innanfor rammene til dette prosjektet. Eksempel på slike er: Elv frå Langavatnet til Gardvika (32 V 298036 6677784), Elv Austefjord frå Svidvatnet (32V324008-6666009), med fleire.

## OPPSUMMERING

Søk etter elvemusling kan gjerast med fleire metodar. Den tradisjonelle, som er nytta i dette arbeidet, er visuelt søk gjennom elv, støtta av vasskikkert eller dykkarmaske. Metoden er tidkrevjande, sidan ein normalt må söke over store elveareal, og den påviser dessutan berre elvemusling som ikkje er nedgrave eller skjult på andre måtar. Ved denne undersøkinga er likevel visuelt søk etter vaksne elvemusingar nytta, sidan den nye metoden basert på funn av miljø-DNA ikkje var tilgjengeleg i 2017.

Ved undersøkinga vart 8 elvar/bekkar til Dåfjorden og 11 elvar/bekkar som renn ut i området rundt Bjørnafjorden undersøkt (**tabell 5, figur 3**).

Meldingar vi fekk inn i samband med arbeidet med kalkingsplan for Fitjar (Kålås mfl. 1995) tilsa at der kunne vere elvemusling i ein eller fleire bekkar som rann ut i Dåfjorden. Som før nemnt vart bestanden i Fjordabekkjen gjenoppdaga i 2013. Ved søk gjennom 8 andre elvar og større bekkar til Dåfjorden i 2017 og 2018 vart det ikkje påvist elvemusling eller skal etter elvemusling. Nokre av lokalitetane var så små at dei truleg kunne vere tørre eller nær tørre i periodar med lite nedbør. Andre hadde ei utforming og ein elvebotn som såg ut til på kunne vere eigna leveområde for elvemusling. Vi kan ikkje utelukke av det kan ha levd elvemusling i nokon av desse, men det må vere fleire tiår sidan.

Erfaringar frå søk etter elvemusling i Hordaland har vist at ein høg andel av bestandane ligg i området rundt Bjørnafjorden. Ved dette søket vart området derfor vald ut som eit fokusområde. Elleve elvar og bekkar som kunne vere eigna som lokalitet for elvemusling vart inkludert. Nokre berre basert på geografi, utforming og eigna vasskvalitet, andre sidan vi veit at her har vore, eller kan ha vore elvemusling i lokaliteten. Vi har fått melding om at der har vore elvemusling i Sørelva i Fusa (Geir Ragnhildstveit pers. medd. i: Kålås 2012) og Fanaelven i Bergen (Kålås 2012, Kleiven & Dolmen 2013). Dessutan er det meldt om elvemusling i ei elv med namnet Aalandselven i Søndre Bergenhus amt (seinare Hordaland fylke) (Kleiven og Dolmen 2013). Det er ikkje kjent kva elv dette er, men både Ålandselva/Årlandselva i Samnanger kommune og Ålandselva i Fusa har namn som liknar, og ligg i eit relevant område, så desse vart av den grunn inkludert i søket. I tillegg har Ålandselva i Fana i Bergen kommune og Ålandsvassdraget i Stord kommune liknande namn, men desse vart ikkje undersøkt ved dette arbeidet.

Det vart funne skal av eit fåtal elvemusling på botnen i Sørelva i Fusa. Dette bekreftar dei meldingar vi tidlegare har fått om at det har vore elvemusling i denne elva. Elvemusling vart også funne i Sundfjordelva i Fusa, men desse var levande. Forvaltningen har tidlegare ikkje vore kjent med at det har vore elvemusling i denne elva, men lokale har visst om dette i alle fall tilbake til 1960-talet og truleg lengre (Pers medd. Sigbjørn Sundfjord & Håkon Johannes Sundfjord). Elles vart det ikkje funne levande elvemusingar eller skal etter elvemuslingar i nokon av dei undersøkte elvane. Fleire av desse såg ut til å kunne vere eigna leveområde for elvemusling.

Av dei nitten lokalitetane som vart undersøkt vart det gjort eit nytt funn i Sundfjordelva, og bekrefta tidlegare førekommst i Sørelva ved Skjelbreid i Fusa. I Fanaelven, der det tidlegare har vore elvemusling (sjå kapittel om Historisk kjent elvemusling), vart det ikkje gjort funn. Heller ikkje i dei to elvane som kan ha vore den ikkje kartfesta Aalandselven, der det også skal ha vore elvemusling (Kleiven & Dolmen 2013). Undersøkinga tyder ikkje på at det finst att mange bestandar av elvemusling i Hordaland som vi ikkje kjenner til, men ein kan heller ikkje utelukke at det kan finnast udokumenterte bestandar.

# INVENTERING AV ELVEMUSLINGBESTANDAR I TRE ELVAR I HORDALAND I 2018

Det vart i 2018 utført inventeringar i tre elvar i Hordaland med bestandar av elvemusling. Desse elvane er: Femangerelva og Sundfjordelva i Fusa kommune, og Fjordabekkjen i Fitjar kommune.

Femangerelva vart enkelt undersøkt i 2007 og 2010 (Kålås 2008, 2012), men då vart berre ein liten del av elva undersøkt. Bestanden i Sundfjorelva vart oppdaga i 2018 og inventeringa som er rapportert her er den første som er gjort i elva. Bestanden i Fjordabekkjen vart gjenoppdaga i april 2013. I august 2013 vart bestanden enkelt undersøkt. Denne undersøkinga er kort oppsummert i denne rapporten, medan undersøkinga som vart gjennomført i august 2018 er rapportert her. Desse bestandane er dermed fullstendig undersøkt og dokumentert for første gang.

## METODAR

Metodane vi har nytta føl retningslinjene til den nasjonale overvakning av elvemusling (Larsen & Hartvigsen 1999, Larsen mfl. 2000). Sidan førekostane har ei kort utbreiing og bestandar er relativt små, er heile elvestrekningane undersøkt for alle elvane. Dette for å kartlegge utbreiinga og fordelinga til elvemuslingane i elva og for å få eit tal på kor mange elvemusling som er synlege frå overflata i dei ulike elvane. Det er også grave i elvebotnen, ca. 5 cm djupt, nokre kvadratmeter i utvalde parti av elvane, for å få eit anslag for kor stor andel av elvemuslingane som levere nede i elvebotnen i dei ulike elvane. Det er dels nytta vasskikkert og dels dykkardrakt eller maske og snorkel ved undersøkingane på overflata, og ymse hagereiskapar er nytta for å grave i substratet. Eit tilfeldig utval av elvemusling som vart funne på overflata og nede i elvebotnen er grunnlaget for presentasjonen av storleksfordelinga til elvemuslingane i dei ulike elvane. Posisjonar til muslingane er plotta med GPS-mottakar. Merk at posisjonar tatt med GPS i Femangerelva ikkje har same presisjon som i dei andre elvane. Dette sidan elva renn gjennom ein trong dal, som gjer at ein får kontakt med få GPS-satellittar.

## RESULTAT

### FEMANGERELVA

Femangerelva i Fusa kommune renn frå Botvatnet (76 moh.) til Femangerbukta, som er ein del av Bjørnafjorden (**figur 5**). Elva er om lag 1,4 km lang, og har eit nedbørfelt ved utløpet på 23 km<sup>2</sup>. Nedbørfeltet består i hovudsak av skog, noko snaufjell og litt myr (NEVINA). Øvst oppe veksler elva mellom lengre strekningar/hølar med mineralsk substrat og korte stryk som renn over sva. Om lag 600 m nedover vert elva breiare, flatare og grunnare. Øvst på dette partiet er substratet ei blanding av mineralsk og organisk materiale, lenger nede dominere organisk materiale/dynn på botnen. Den flate breie strekninga er nær 300 m lang. Deretter renn elva brattare og til slutt utfør ein foss ut i sjøen, som er vandringshinder for anadrom fisk. På dette siste partiet er botnen mest grovsteina. Elva vart anslått til å ha ei gjennomsnittleg breidde på 7 m. På det grunne og flate området midtvegs er elva langt breiare. I tillegg til fossen nedst er det fossar, som er naturlege vandringshinder for fisk, også øvst ved Botvatnet og litt oppstraums det flate og breie partiet av elva, ca. 500 m nedom Botvatnet.

Øvre delar av elva ligg innanfor Yddal naturreservat. Det er busetnad berre i nedre delar av vassdraget. Av landbruksaktivitetar er det sporadisk litt beiting langs midtre og nedre delar av elva, og ikkje anna landbruk i nedbørfeltet. Eit smoltanlegg som ligg ved elva sitt utlaup til sjø, tek vatn frå Botvatnet og elva til si drift.

Det vart analysert vassprøvar frå Femangerelva i samband med kartlegging av elvemusling våren og hausten 2011 (Kålås 2012). Desse prøvane viste at vasskvaliteten var innanfor det som er rekna som godt livsmiljø for elvemusling (Degerman mfl. 2009).



**Figur 5.** Femangerelva, Som renn frå Botnvatnet i aust til Femangerbukta i vest. Streken i elva viser strekninga frå nedste til øvste elvemusling vi fann ved undersøkinga.

### Elvemuslingen si utbreiing

Heile elva frå Botnvatnet til siste foss før sjøen vart undersøkt ved snorkling 7. juni 2018. Det var pent stille vær, og låg vassføring då snorklinga vart gjennomført. Vasstemperaturen var 20 °C. Øvste musling vart funnen omlag 100 m nedstraums Botnvatnet (32V 320965 6669215). Nedste observerte musling vart funnen på øvste del av sletteområdet som ligg midtvegs i elva (32V 321448 6669197). Strekninga med elvemusling er ca. 500 m lang (**figur 5**).

### Talet på elvemusling og tettleiken til elvemuslingen

Ei grundigare teljing av elvemuslingen i elva vart gjennomført 12. juli 2018 på strekninga av elva der det vart påvist musling ved søket 7. juni 2018. Det vart då funne 177 elvemuslingar på overflata. Desse stod enkeltvis eller to til tre saman, men ikkje i større «clusters». Ved graving av totalt 5 m<sup>2</sup> substrat, fordelt på tre felt, i øvre delar av utbreiingsområdet (rundt 32V 321419 6669206), der vi fann høgast tettleik av elvemusling på overflata, vart det funne ytterlegare fem elvemuslingar. Dette var eit svært godt habitat for elvemuslingen, så tettleiken her er ikkje representativ for andre delar av elva. Ved graving i substratet på to felt på totalt 2 m<sup>2</sup> i nedre delar av utbreiingsområdet til elvemuslingen (32V 321015 6669221) vart det ikkje funne elvemusling. Ingen tomme skal vart funne ved undersøkingane i juni og juli 2018.


Arealet til strekninga der vi fann elvemusling er om lag  $3500\text{ m}^2$ . Tettleiken av musling observert på overflata var då i gjennomsnitt  $0,05$  per  $\text{m}^2$ . Vi kan har oversett enkelte muslingar på overflata. I tillegg kjem musling som eventuelt er skjult i substratet. Enkelte slike finst. Kor mange er usikkert, men den totale tettleiken av musling i Femangerelva er truleg ikkje høgare enn  $0,2$  per  $\text{m}^2$ .

### Lengdefordeling

Eit tilfeldig utval av 30 elvemusling vart lengdemålt 7. juni 2018, og desse er presentert saman med dei fem muslingane som vart funne i substratet ved gravinga 12. juli 2018 (**figur 6**). Denne fordelinga viser storleikane til elvemusling som var representert i Femangerelva sommaren 2018. Vi fann ingen muslingar kortare enn 20 mm, men ein som var 48 mm og hadde sju synlege soner på skale. Vi fann også nokre som var like over 50 mm. Dei inste/første alderssonene vil ikkje syne når muslingen har vorte så stor som ca. 50 mm, så vi anslår at desse var vel ti år gamle. Andelen elvemusling under 50 mm er usikker å anslå når tettleiken av elvemusling er så låg som i denne elva. Store elveareal måtte gravast opp for å få eit sikkert mål på dette. Inntrykket er at andelen er under 5 %. Tettleiken av elvemusling kortare en 20 mm er av same grunn også usikker ved slike låge tettleikar, men inntrykket frå undersøkinga er at dette er svært lågt.

### Vertsnart

Laks eller aure kan vere vert for larvar til elvemusling. Femangerelva er ikkje lakseførande, og dermed må det vere aure som er vert for elvemuslingen. Det er ved tidlegare undersøkingar funne larver av elvemusling på gjeller til aure i elva (Kålås 2008, Kålås 2012).



**Figur 6.** Storleikfordelinga til eit utval på 30 elvemusling frå overflata til elvebotnen til Femangerelva som vart lengdemålt 7. juni 2018, og fem elvemusling som vart gravd opp frå elvebotnen 12. juli 2018.

### OPPSUMMERT

Det finst ein liten bestand av elvemusling i Femangerelva. Denne lever på ei strekning på ca. 500 m i øvre delar av elva. 177 store vaksne individ vart observert på overflata av elvebotnen 12. juli 2018. I tillegg lever ei ukjent mengde elvemusling nede i substratet. Tettleiken av elvemusling på overflata var  $0,05$  individ per  $\text{m}^2$  på elvestrekninga der vi fann elvemusling. Største og minste musling funne ved undersøkinga var høvesvis 48 mm og 105 mm lange. Dei fleste muslingane var rundt 100 mm lange, ein låg andel av bestanden er unge, og bestanden er forgubba. Det har sporadisk skjedd rekruttering dei siste 20 åra (**tabell 6**). Aure er vertsfisk for muslinglarver i Femangerelva. Noverande status for bestanden i vassdraget er at den er kategorisert som «truet» har «liten levedyktighet» og er «ikke livskraftig» etter

ulike klassifiseringsmetodar (**tabell 6**). Sikkerheita til vurderinga er god, då datagrunnlaget er relativt godt. Når tettleiken av elvemusling er låg må eit stort areal elvebotn undersøkast ved graving for å få eit sikkert estimat for andel små muslingar som lever nede i elvebotnen. Eit større areal elvebotn kunne med fordel vore gjennomsøkt i Femangerelva, men slikt søk er tidkrevjande og var ikkje var innanfor rammene til denne undersøkinga.

**Tabell 6.** Oppsummering av data for bestanden av elvemusling i Femangerelva. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,5 km (1 poeng)	Øvre del av elva
Antall individ	177 (1 poeng)	Observert på overflata
Tettleik ind/m <sup>2</sup>	0,05 (1 poeng)	Basert på teljing på overflata
Gjennomsnittslengde ± s.d.	96 ± 9 mm	30 ind. frå overflata
Minste musling observert	48 mm (2 poeng)	
Andel < 20 mm	< 5 % (1 poeng)	Ingen observert
Andel < 50 mm	< 5 % (1 poeng)	Ein observert
Vertsart	Aure	
Klasse	Klasse 1 (totalt 7 poeng)	«truet» «liten levedyktighet»
Naturindeks indikatorverdi	0,6	«Ikke livskraftig»
Datagrunnlag per.	Godt i 2018	


## SUNDFJORDDELVA

Sundfjordelva i Fusa kommune renn frå Håvikvatnet (57 moh) til Sundfjordvågen, som er ein del av Lygrepollen, som leier ut i Bjørnafjorden (**figur 7**). Elva er om lag 1,8 km lang, og har eit nedbørfelt ved utløp til sjø på vel 8 km<sup>2</sup>, med ei middelvassføringa på i underkant av 0,5 m<sup>3</sup>/s (61-90) (nevina.no). Øvst oppe, dei første hundre meter, er elva ein løk på høgd med innsjøen. Den renn så gjennom to fossar som er vandringshinder for fisk, så over eit myrparti, før den renn brattare ned mot sjøen dei siste om lag 500 meter. Der elva er bratt renn den over sva eller stein, på øvre delar av myrpartiet har elva mest mineralsk botn, medan botnen lenger nede på myra har høgt organisk innhald. Elva vart anslått til å ha ei gjennomsnittleg breidde på 2 m, men dette varierer noko. Fisk kan ikkje vandre opp det bratte partiet nedst i elva, og heller ikkje gjennom dei to fossane lenger oppe i elva. Det vart bygd dam og sagbruk i Sunnfjord ca. 1900, og før dette kunne fisk frå sjøen vandre opp frå sjøen og fram til fossen om lag 1 km oppover (Håkon Johannes Sundfjord, Pers. medd.).

Det er knapt busetnad eller landbruksaktivitetar i nedbørfeltet. Eit fiskeanlegg tek vatn frå vassdraget til si drift.

Analysar av vassprøvar frå 1995 tekne i samband med kalkingsplanen for Fusa kommune (Johnsen mfl. 1995), viste at surleiken i Sundfjordelva var høg og rundt pH 7. Vi er ikkje kjent med andre analysar av vasskvaliteten i Sundfjordelva, men det er ingen forhold som tilseier at vasskvaliteten skal vere avgrensande for elvemuslingen.

Forekomsten av elvemusling vart påvist 7. juni 2018. Utbreiinga vart då kartlagt. Grundigare undersøkingar av talet og storleiken til elvemusling i utbreiingsområdet vart utført 20. juli 2018. Det var pent vær, låg vassføring og ideelle tilhøve for undersøkinga desse dagane.



**Figur 7.** Sundfjordelva i Fusa, som renn frå Håvikvatnet i sørvest til Sundfjordvågen i nord. Streken i elva viser strekninga frå nedste til øvste elvemusling som vi fann ved undersøkinga.

### Elvemuslingen si utbreiing

Elva renn bratt siste delen ned mot sjøen, men ca. 100 m oppover flatar den litt ut. Frå her og i underkant av 1 km oppover vart det søkt etter elvemusling på botnen. Områda lenger nede er strie og områda lenger oppe har stilleståande vatn, og er ikkje eigna for elvemusling. Det vart søkt med vasskikkert på heile denne strekninga 7. juni 2018. Første musling vart funnen i elva om lag 600 m oppover frå sjøen (32 V 321046 6661140) medan den øvste muslingen låg ca. 300 m lenger oppe (32 V 320862 6660906) (**figur 7**). Mellom desse punkta var det to - tre mindre områder der dei fleste muslingane låg. Botnen var sand og grus, med eit lågt innslag av organisk materiale.

### Talet på elvemusling og tettleiken til elvemuslingen

Ei grundigare teljing av elvemuslingen i elva vart gjennomført 20. juli 2018 på strekninga av elva der de vart påvist musling 7. juni 2018. Det vart då funne 77 levande elvemusling og 24 tomme skal etter elvemusling på overflata av elvebotnen. Desse stod enkeltvis eller i mindre flokkar. Ved graving av totalt  $5\text{ m}^2$  substrat, fordelt på tre felt, i området der vi fann høgst tettleik av elvemusling på overflata, vart det ikkje påvist elvemusling.

Arealet til strekninga der vi fann elvemusling er om lag  $600\text{ m}^2$ . Tettleiken av musling observert på overflata var dermed i gjennomsnitt 0,13 per  $\text{m}^2$ . I tillegg kjem musling som eventuelt er skjult i substratet. Vi fann ingen slike ved oppgraving av eit areal på  $5\text{ m}^2$  med eigna substrat, i området der vi fann mest musling. Inntrykket frå gravinga er at det var få eller ingen unge muslingar i elva.


### Lengdefordeling

Eit tilfeldig utval av 65 av muslingane, som vart funne 20. juni 2018, vart lengdemålt og etterpå lagt tilbake i elva der dei vart funne (**figur 8**). Tomme skal vart også lengdemålt, men vart ikkje lagt tilbake

i elva. Målingane viste at muslingane i hovudsak var mellom 90 og 120 mm lange. Gjennomsnittslengda til levande muslingar var 105 mm. Vi fann ingen levande muslingar kortare enn 20 mm eller 50 mm. Minste levande musling var 70 mm. Lengdefordelinga til tomme skal var om lag som for levande musling. Gjennomsnittslengda var 100 mm og kortaste tomme skal var 78 mm.

## Vertssart

Laks eller aure kan vere vert for larvar til elvemusling. Det er no ikkje mogleg for laks å vandre opp i Sundfjordelva, og derfor må det vere aure som er vert for elvemuslingen. Gjeller til ungfish fra Sundfjordelva er ikkje undersøkt for muslinglarver.



**Figur 8.** Storleikfordelinga til eit utval på 65 levande og 24 døde elvemusling frå overflata til elvebotnen til Sundfjordelva som vart lengdemålt 20. juli 2018.


## OPPSUMMERT

Det finst ein liten bestand av elvemusling i Sundfjordelva. Denne lever på ei strekning på ca. 300 m i øvre delar av elva. 77 store vaksne individ vart observert på overflata. I tillegg kan det finnast ein del elvemusling av same storleik som er skjult under steinar, vegetasjon og død ved, som ligg i elva. Det totale talet på musling i elva er derfor minst 77, men truleg ikkje over 120. Det vart ikkje gjort funn av små elvemusling nede i elvebotnen. Tettleiken av elvemusling på overflata var 0,13 individ per m<sup>2</sup> på elvestrekninga der vi fann elvemusling. Største og minste musling var høvesvis 70 mm og 120 mm lange. Dei fleste muslingane var mellom 90 mm og 120 mm. Storleksfordelinga til døde individ funne i elva er omlag lik storleiken til levande muslingar i elva. Dette tyder på at det ikkje er gamle individ som døyr av elde, men at dødelegheita er lik på alle aldersgrupper i bestanden. Bestanden er forgubba og her ser ikkje ut til å ha vore rekruttering på fleire tiår. Noverande status for bestanden, basert på ulike klassifiseringsmetodar (sjå metodekapittel), er at den er «truga» og «snart forsvunnen» (**tabell 7**). For å betre denne statusen må det skje rekruttering her, enten naturleg, eller ved at det blir dyrka fram små muslingar i kultiveringsanlegg. Sidan der ikkje er laks i elva må aure vere vertsfisk for muslinglarver i Sundfjordelva.

Sikkerheita til vurderinga er god, då datagrunnlaget er relativt godt. Når tettleiken av elvemusling er låg, slik som i Sundfjordelva, må eit stort areal elvebotn gravast gjennom for å få eit sikkert estimat for andel små muslingar, og mengde og andel musling som lever nede i substratet. Eit større areal elvebotn kunne med fordel vore gjennomsøkt, men dette er tidkrevjande og var ikkje innanfor rammene til undersøkinga.

**Tabell 7.** Oppsummering av data for bestanden av elvemusling i Femangerelva. Sjå metodebeskriving for bakgrunnen til kategoriseringa.

Tema	Verdi	Merknader
Utbreiling	0,3 km (1 poeng)	Midtre delar av elva
Antall individ	77 (1 poeng)	På overflata av elvebotnen
Tettleik ind/m <sup>2</sup>	0,13 (1 poeng)	Basert på teljing på overflata
Gjennomsnittslengde ± s.d.	105 ± 10 mm	65 individ frå overflata
Minste musling observert	70 mm (1 poeng)	
Andel < 20 mm	0 % (1 poeng)	Ingen observert
Andel < 50 mm	0 % (1 poeng)	Ingen observert
Vertsart	Aure	Antatt, sidan ikkje laks i elva
Klasse	Klasse 1 (6 poeng)	«Truet» «liten levedyktighet»
Naturindeks indikatorverdi	0,2	«Snart forsvunnet»
Datagrunnlag per.	Godt i 2018	



**Figur 9.** Elvemuslingar observert i Sundfjordelva i Fusa kommune 7. juni 2018.

## FJORDABEKKJEN

Fjordabekkjen i Fitjar renn frå Søretjørna (16 moh.) til Dåfjorden (**figur 10**). Elva er om lag 650 m lang og har eit nedbørfelt på vel 3 km<sup>2</sup> ved utløp til sjø (nevina.no). Elva er 1 til 2 m brei. Middelvassføringa er berekna til 0,24 m<sup>3</sup>/s (66-91). Skog og myr utgjer størstedelen av nedbørfeltet, men her er også 4 % dyrka mark. Dei øvste 250 meter renn elva brattare og har botn beståande av stein og grus. Deretter flatar den ut og har eit substrat av sand og grus. Fisk kan vandre opp det meste av elva, fram til øvste oppe mot Søretjørna, der den er bratt og stri.

I samband med utarbeidning av kalkingsplan for Fitjar i 1994 (Kålås mfl. 1995) kom det inn melding om at det kunne finnast elvemusling i elvar som rann til Dåfjorden. Dette vart ikkje undersøkt nærmere då, men førekommst av elvemusling vart påvist i Fjordabekkjen 23. mars 2013 av L. Nathalie Jurs og Bjørnar Løkstad.

Bestanden vart enkelt undersøkt 29. august 2013 (av Magnus Johan Steinsvåg og Steinar Kålås, upubliserte data). Det var låg vassføring og klårt vatn i elva. Det vart talt 2300 vaksne elvemuslingar på ei 300 m lang strekning. Eit utval elvemusling vart målte, og desse var frå 49 til 107 mm lange. Mange muslingar var skjult under andre muslingar, låg under elvebar, eller var skjult på annan måte. Nokre kunne også vere nedgrave i grusen, så det var langt fleire muslingar i elva enn vi observerte.

Gjeller til 21 unge aure i Fjordabekkjen vart samla inn 2. april 2014 (av Marius Kampestad og Steinar Kålås, upubliserte data). Andel infiserte fisk (prevalens) var vel 75 % og median infeksjonsintensitet var 30 glochidier. Det var lett å observere infeksjon på fiskane i felt. Dette viser at aure er hovudvert for elvemuslingen i Fjordabekkjen og at muslingane fekk gjennomførte livssyklusen fram til larvar på fiskegjeller.


Analysar av vassprøvar frå 1995 tekne i mai og august i samband med kalkingsplanen for Fitjar kommune (Kålås mfl. 1995), viste surleikar i Søretjørna på høvesvis pH 6,7 og pH 5,7. I samband med at bestanden av elvemusling vart gjenoppdaga i 2013 vart det teke vassprøvar i november 2013 og april 2014 (tidlegare upubliserte data). Surleiken var då høvesvis pH 6,6 og pH 6,3 (vedleggstabell 1), turbiditet og innhald av næringsstoff var klart innanfor grenser for godt livsmiljø for elvemusling (Degerman mfl. 2009). Innhaldet av kalsium var like over 2 mg/l, noko som er lågt samanlikna med det ein finn i norske vassdrag med elvemusling, men relativt høgt samanlikna med vassdrag i Hordaland.

### Elvemuslingen si utbreiing

Heile elva frå sjøen til Søretjørna vart undersøkt ved observasjon gjennom vasskikkert 21. august 2018 (**figur 12**). Det var pent stille vær, og låg vassføring då undersøkinga vart gjennomført. Vasstemperaturen var mellom 15 og 18 °C gjennom dagen. Nedste musling vart funnen om lag 30 m oppom flomålet (32 V 295381 6639710) medan den øvste vart funnen om lag 250 m lenger oppe i elva (32 V 295338 6639876) (**figur 10**).

**Tabell 8.** Fordelinga til elvemuslingane frå utløp til sjøen (32 V 295381 6639710) til enden av sone 9, ca. 400 m oppover elva. Talet på musling observert frå overflata, plukka frå overflata og gravd opp frå botnsubstratet på eit areal på totalt 11 m<sup>2</sup> i Fjordabekkjen 21. august 2018.

Sone	Til	levande	døde
1	32 V 295378 6639707	1	2
2	32 V 295358 6639745	31	1
3	32 V 295349 6639776	282	2
4	32 V 295333 6639817	996	3
5	32 V 295333 6639856	546	11
6	32 V 295332 6639866	296	1
7	32 V 295324 6639894	19	0
8	32 V 295295 6639940	0	0
9	32 V 295276 6639989	0	0
Totalt		2 171	20



**Figur 10.** Fjordabekkjen, som renn frå Søretjørna i nord til Dåfjorden i sør. Streken i elva viser strekninga frå nedste til øvste elvemusling som vi fann ved undersøkingane.

## Talet på elvemusling og tettleiken til elvemuslingen

Elva vart delt i ni soner, frå elveosen og ca. 400 m oppover (**tabell 8**). Ved søket gjennom elva 21. august 2018 vart det observert totalt 2171 elvemusling. Det var låg tettleik av elvemusling i den to nedste sonene, og ingen i dei to øvste. Høgast tettleik var det i dei fire midtre sonene av utbreiingsområdet til muslingane (**tabell 8**). Der det var høg tettleik av elvemusling låg dei i fleire lag på elvebotnen. Det var også vanskeleg å sjå muslingar som låg innunder elvekantane eller som var skjulte på annan måte. Det var derfor langt fleire elvemusling i elva enn det vi observerte. Tettleiken av elvemusling observert frå overflata på strekninga frå nedste til øvste musling var 5,8 per m<sup>2</sup> på eit 375 m<sup>2</sup> stort areal. Det vart også funne 20 tomme skal etter elvemusling, og desse vart tekne ut av elva.

Fire områder, med eit samla areal på 11 m<sup>2</sup> vart grundigare undersøkt (**tabell 9**). Her vart først alle synlege muslingar på overflata talt. Deretter vart alle muslingar på overflata tatt opp. Talet på muslingar som vart tatt opp var vanlegvis klart høgare enn talet på muslingar observert frå overflata, sidan muslingar låg oppe på kvarandre, eller var skjulte på annan måte. Totalt på arealet vart det observert 64 elvemusling (5,8 per m<sup>2</sup>). Då alle muslingar på overflata vart plukka opp var talet 144, og ytterlegare 53 var nedgrave i substratet (**tabell 9**). Totalt var 197 elvemusling funne på det 11 m<sup>2</sup> store arealet (17,9 per m<sup>2</sup>). Om dette er representativt for elva må talet på musling observert frå overflata multipliserast med 3,1 om vi skal få eit anslag for det totale antallet individ i elva. Det var i så fall vel 6600 elvemuslingar i elva ved undersøkinga i august 2018. Det vart også funne fem tomme skal av elvemusling på dette området.

**Tabell 9.** Talet på musling observert frå overflata, plukka frå overflata og gravgd opp frå botnsubstratet på eit areal på totalt 11 m<sup>2</sup> i Fjordabekkjen 21. august 2018.

Lokalitet	UTM	Areal (m <sup>2</sup> )	Antall		
			Obs. overflate	Plukka overfl.	Gravd opp
1	32V 295363 6639747	3	4	4	3
2	32V 295326 6639813	2,5	42	103	19
3	32V 295337 6639838	2,5	33	33	12
4	32V 295322 6639866	3	4	4	19
Totalt:		11	64	144	53


## Lengdefordeling

Alle muslingar som vart funne ved plukking og graving på eit totalt 11 m<sup>2</sup> stort område av elvebotnen 21. august 2018 vart lengdemålt (n=197 levande). Desse er presentert saman med fem tomme skal som vart funne på same området (**figur 11**). Det vart ikkje funne musingar kortare enn 20 mm, men 21 som var kortare enn 50 mm (11 %). Desse hadde tre til fem synlege soner i skalet. Dei inste alderssonene viser ikkje når muslingane har vakse seg store, så ein må leggje til to-tre år for å få totalalderen. Alderen til dei minste muslingane vi fann var dermed fem til åtte år.

## Vertssart

Ved undersøking 2. april 2014 vart det berre funne aure i elva. Andelen ungfish med elvemuslinglarvar var 75 % (sjå innleiinga over).

## Storleksfordeling til elvemusling i Fjordabekkjen



**Figur 11.** Storleksfordelinga til all musling funne på overflata og i substratet til fire tilfeldig valte område med eit samla areal på 11 m<sup>2</sup> i Fjordabekkjen 21. august 2018.

## OPPSUMMERT

Det finst tett bestand av elvemusling på ein 250 m lang strekning av Fjordabekkjen (**tabell 10, figur 10**). Ved undersøkinga vart 2171 individ observert, men mange var skjult eller nedgravne, så bestandestimatet, basert på det vi fann då vi tok opp all elvemusling på eit avgrensa areal, er 6600 individ. Tettleiken av elvemusling på overflata basert på dette bestands estimatet er 19,9 per m<sup>2</sup>. Største og minste musling var høvesvis 27 mm og 114 mm lange. Dei fleste muslingane var rundt 95 mm lange. Andelen musling under 50 mm var 11 %, men ingen kortare enn 20 mm vart funne. Sjølv om det står betre til med denne bestanden enn dei fleste andre bestandar av elvemusling i Hordaland seier ulike metodar for å vurdere status til bestanden at den er «sårbar», «sannsynlig levedyktig» og «ikke livskraftig» (**tabell 10**). Datagrunnlaget var godt og vurderingane er sikre.

**Tabell 10.** Oppsummering av data for bestanden av elvemusling i Fjordabekkjen. Sjå metodebeskriving for bakgrunnen til kategoriseringa.

Tema	Verdi	Merknader
Utbreiing	0,25 km (1 poeng)	Nedre delar av elva
Antall individ	2171/6600 (2 poeng)	På overflata/totalestimat
Tettleik ind./m <sup>2</sup>	5,8/17,9 (6 poeng)	På overflata/totalestimat
Gjennomsnittslengde ± s.d.	86 ± 27 mm	n=197, frå Lokalitet 1-4 (11 m <sup>2</sup> )
Minste musling observert	27 mm (4 poeng)	
Andel < 20 mm	0 % (1 poeng)	Ingen observert
Andel < 50 mm	11 % (3 poeng)	21 av 197
Vertsnart	Aure	Etter undersøking 2. april 2014
Klasse	Klasse II (16 poeng)	«Sårbar» «sannsynlig levedyktig»
Naturindeks indikatorverdi	0,6	«Ikke livskraftig»
Datagrunnlag per.	Godt i 2018	



**Figur 12.** Frå inventeringa av Fjordabekkjen 21. august 2018.

# MÅLINGAR AV REDOKSPOTENSIAL I ELVAR MED ELVEMUSLING I HORDALAND I 2014 OG 2018

Det er funne rekrutteringssvikt i mange bestandar av elvemusling, spesielt i Sør-Norge. Ein finn mange stader ein del eldre muslingar, men få eller ingen unge. På gjeller til vertsfisk kan vi finne elvemuslinglarver, men desse har truleg låg eller inga overleving etter at dei har sleppt seg av verten og skal klare seg sjølv nede i elvebotnen. Årsaka er truleg dårleg habitatkvalitet. Tilslamming av elvebotnen som hindrar gjennomstrøyming kan redusere oksygeninnhaldet i elvebotnen. Det kan også auka oksygenforbruk som følgje av høg mikrobiell aktivitet i elvebotnen, grunna store tilførsler av næringsstoff til vassdraga.

Redokspotensial er ein indikator for habitatkvaliteten i elvebotnen med tanke på oksygeninnhald og oksygenforbruk, og vert nytta til på vurdere livsmiljøet for juvenil elvemusling som lever nede i substratet. I følgje Degerman mfl. 2009 er eit av krava til godt livsmiljø for elvemusling at redokspotensial i elvebotnen må være over 300 mV (milliVolt). Magerøy (2019) klassifiserer absolutte redokspotensialverdiar som «god habitatkvalitet» ( $>400$  mV), «moderat habitatkvalitet» (400-300 mV) og «dårleg habitatkvalitet» ( $<300$  mV) for juvenil elvemusling. Tilsvarande vert reduksjonen i redokspotensial mellom frie vassmassar og substratet, klassifisert som «god habitatkvalitet» (<20 % reduksjon), «moderat habitatkvalitet» (20-30 % reduksjon) og «dårleg habitatkvalitet» ( $>30$  % reduksjon) for dei yngste elvemuslingane (sjå også Geist & Auerswald 2007 og Larsen 2012 for bakgrunn).

## METODAR

Redokspotensial i elvebotnen vart målt med eit instrumentoppsett levert av Dr. Frank Krüger (**figur 13**). Redokspotensial er eit indirekte mål på oksygenforbruket i substratet. Låge verdiar antydar høgast oksygenforbruk. Målingane er basert på metode beskrive av Larsen (2012) og referansar i denne. Målingane vart gjort 5 cm nede i elvebotnen. Talet på målingar og stasjonar vart tilpassa elvebreidda og strekning med elvemusling. I tillegg er det gjort referanse måling i dei opne vassmassane på kvar lokalitet. Eigne erfaringar har vist at det kan ta svært lang tid å få stabile enkeltmålingar for redokspotensial. Dette er spesielt krevjande der leiingsevna i vatnet er låg (vatnet er ionefattig). Om leiingsevna er høg får ein normalt ei stabil måling i løpet av 2-3 minutt, medan det kan ta 15 minutt å få ei stabil måling der leiingsevna er låg.



**Figur 13.** Målingar av redokspotensial i Haukåselva 7. september 2018.

## RESULTAT

### FJORDABEKKJEN

Det var gjennomført redokspotensialmålingar på to stadar i Fjordabekkjen i Fitjar kommune 3. september 2018. Det var pent vær, lufttemperaturen var 18 °C og vasstemperaturen var 14 °C då målingane vart gjort. Det var middels høg vassføring i elva. Elva er berre 1 til 2 m brei, og målingar vart gjort på punkt i området ved oppgjevne posisjonar (**vedleggstabell 2**). Det var om lag ein halvmeter mellom kvar målepunkt, som låg frå nær elvekant til sentralt i elva. Det tok lang tid å få stabile målingar på kvart målepunkt, truleg grunna ionefattig vatn i elva.

Medianverdiar for målingane var 511 mV (gjennomsnitt 504 mV), med ein variasjon mellom 412 og 605 mV (**figur 14, vedleggstabell 2**). Alle målingar 5 cm nede i substratet viste redokspotensial på over 400 mV («god habitatkvalitet») (**tabell 11, figur 15**). Median reduksjonen i redokspotensial mellom vatnet over elvebotnen og 5 cm nede i substratet var 9 % (gjennomsnitt 13 %) med variasjon mellom 1 % og 30 %. 71 % av målingane viste under 20 % reduksjon i redokspotensial («god habitatkvalitet») og for 29 % av målingane var reduksjonen 20 – 30 % («moderat habitatkvalitet») (**tabell 12, figur 14 & 15**).

**Tabell 11.** Klassifisering av habitatkvalitet basert på målingar av redokspotensial i substratet i Fjordabekkjen 3. september 2018.

Kategori	Måleverdiar	n	%
God habitatkvalitet	>400 mV	14	100
Moderat habitatkvalitet	300-400 mV	0	0
Dårleg habitatkvalitet	<300 mV	0	0
Totalt		14	100

**Tabell 12.** Klassifisering av habitatkvalitet basert på reduksjon i redokspotensial mellom overflatevatn og substratet i Fjordabekkjen 3. september 2018.

Kategori	Fordeling	n	%
God habitatkvalitet	< 20%	10	71
Moderat habitatkvalitet	20-30%	4	29
Dårleg habitatkvalitet	> 30%	0	0
Totalt		14	100

### FEMANGERELVA

Det var gjennomført redokspotensialmålingar på to stadar i Femangerelva i Fusafossen 16. juli 2014. Det var lett regn, lufttemperaturen var 16 °C og vasstemperaturen var 16 °C då målingane vart gjort. Elva er seks-sju meter brei, og målingar på kvar lokalitet vart gjort som tre transekt, kvar med fem punkt i breidda med ein meters avstand mellom punkta. Det vart målt på to stadar, med totalt tretti målepunkt. Det tok lang tid, inntil 15 minutt, å få stabile målingar på kvart målepunkt, truleg grunna ionefattig vatn.

Medianverdiar for målingane var 539 mV (gjennomsnitt 494 mV), med ein variasjon mellom 97 og 578 mV (**figur 14, vedleggstabell 3**). 90 % av målingar 5 cm nede i substratet viste redokspotensial på over 400 mV («god habitatkvalitet») (**tabell 13**). Median reduksjonen i redokspotensial mellom vatnet over elvebotnen og 5 cm nede i substratet var 7 % (gjennomsnitt 13 %) med variasjon mellom 1 % og 83 % (**figur 14, vedleggstabell 3**). 77 % av målingane viste under 20 % reduksjon i redokspotensial («god habitatkvalitet»), for 13 % av målingane var reduksjonen 20 – 30 % («moderat habitatkvalitet») og 10% av målingane viste meir enn 30% reduksjon i redokspotensial («dårleg habitatkvalitet») (**figur 14 & 15**). Dei få målepunkta som indikerte dårlig habitatkvalitet vart tekne i bakkene og nær land.

**Tabell 13.** Klassifisering av habitatkvalitet basert på målingar av redokspotensial i substratet i Femangerelva 16. juli 2014.

Kategori	Måleverdiar	n	%
God habitatkvalitet	>400 mV	27	90
Moderat habitatkvalitet	300-400 mV	2	7
Dårleg habitatkvalitet	<300 mV	1	3
Totalt		30	100

**Tabell 14.** Klassifisering av habitatkvalitet basert på reduksjon i redokspotensial mellom overflatevatn og substratet i Femangerelva 16. juli 2014.

Kategori	Fordeling	n	%
God habitatkvalitet	< 20%	23	77
Moderat habitatkvalitet	20-30%	4	13
Dårleg habitatkvalitet	> 30%	3	10
Totalt		30	100

## FOSSÅA

Det var gjennomført redokspotensialmålingar på to stadar i Fossåa i Fusa kommune 18. juli 2014. Det var pent vær, etter nokre våte dagar. Lufttemperaturen var 20 °C og vasstemperaturen var 18 °C då målingane vart gjort. Elva er fem-seks meter brei, og målingar på kvar lokalitet vart gjort som tre transekt, kvar med fem punkt i breidda med ein meters avstand mellom punkta. Det vart målt på tre stadar, totalt 45 målepunkt. Det tok lang tid, inntil 15 minutt, å få stabile målingar på kvart målepunkt, truleg grunna ionefattig vatn.

Medianverdiar for målingane var 474 mV (gjennomsnitt 444 mV), med ein variasjon mellom 238 og 553 mV (**vedleggstabell 4, figur 14**). 76 % av målingar 5 cm nede i substratet viste redokspotensial i klassen «god habitatkvalitet» (over 400 mV) (**tabell 15, figur 14 & 15**). Median reduksjonen i redokspotensial mellom vatn over elvebotn og 5 cm nede i substratet var 12 % (gjennomsnitt 18 %), med variasjon mellom 0 % og 57 % (**vedleggstabell 4, figur 14**). 69 % av målingane viste under 20 % reduksjon i redokspotensial («god habitatkvalitet»), for 9 % av målingane var reduksjonen 20 – 30 % («moderat habitatkvalitet») og 22 % av målingane viste meir enn 30 % reduksjon i redokspotensial («dårleg habitatkvalitet») (**tabell 16, figur 15**). Dei få målingane som indikerte årleg habitatkvalitet vart tekne i tett sand, i substrat med høgt innslag av organisk materiale og nær land.

**Tabell 15.** Klassifisering av habitatkvalitet basert på målingar av redokspotensial i substratet i Fossåa 18. juli 2014.

Kategori	Måleverdiar	n	%
God habitatkvalitet	>400 mV	34	76
Moderat habitatkvalitet	300-400 mV	4	9
Dårleg habitatkvalitet	<300 mV	7	16
Totalt		45	100

**Tabell 16.** Klassifisering av habitatkvalitet basert på reduksjon i redokspotensial mellom overflatevatn og substratet i Fossåa 18. juli 2014.

Kategori	Fordeling	n	%
God habitatkvalitet	< 20%	31	69
Moderat habitatkvalitet	20-30%	4	9
Dårleg habitatkvalitet	> 30%	10	22
Totalt		45	100

## SKJELÅNA

Det var gjennomført redokspotensialmålinger på tre stadar i Skjelåna i Samnanger kommune 5. september 2018. Det var pent stille vær og låg vassføring. Lufttemperaturen var 18 °C og vasstemperaturen var 14 °C då målingane vart gjort. Det vart målt på ei lokalitet oppstraums og to stadar nedstraums nedste fossen før sjøen (**vedleggstabell 5**). Fem målinger frå elvekanten og ut til midten av elva, med om lag 0,5 m avstand vart målt på kvar lokalitet, totalt 15 målepunkt. Referanse målinger vart gjort i rennande vatn over substratet. Det tok lang tid, inntil 15 minutt, å få stabile målinger på kvart målepunkt, truleg grunna ionefattig vatn.

Medianverdiar for målingane var 437 mV (gjennomsnitt 388 mV), med ein variasjon mellom 209 og 536 mV (**vedleggstabell 5, figur 14**). 53 % av målingar 5 cm nede i substratet viste redokspotensial i klassen «god habitatkvalitet (over 400 mV)» (**tabell 17, figur 14**). Median reduksjonen i redokspotensial mellom vatnet over elvebotnen og 5 cm nede i substratet var 20 % (gjennomsnitt 27 %) med variasjon mellom 2 % og 56 % (**vedleggstabell 5, figur 15**). 47 % av målingane viste under 20 % reduksjon i redokspotensial («god habitatkvalitet»), for 13 % av målingane var reduksjonen 20 – 30 % («moderat habitatkvalitet») og 40 % av målingane viste meir enn 30 % reduksjon i redokspotensial («dårleg habitatkvalitet») (**tabell 18, figur 15**). Substratet var relativt homogent, med lite organisk innhald. Målingar nær land gav lågaste verdier.

**Tabell 17.** Klassifisering av habitatkvalitet basert på målingar av redokspotensial i substratet i Skjelåna 5. september 2014.

Kategori	Måleverdiar	n	%
God habitatkvalitet	>400 mV	8	53
Moderat habitatkvalitet	300-400 mV	2	13
Dårleg habitatkvalitet	<300 mV	5	33
Totalt		15	100

**Tabell 18.** Klassifisering av habitatkvalitet basert på reduksjon i redokspotensial mellom overflatevatn og substratet i Skjelåna 5. september 2018.

Kategori	Fordeling	n	%
God habitatkvalitet	< 20%	7	47
Moderat habitatkvalitet	20-30%	2	13
Dårleg habitatkvalitet	> 30%	6	40
Totalt		15	100

## ÅREIDELVA

Det var gjennomført redokspotensialmålinger på fire stadar i Åreidelva i Bømlo kommune 4. september 2018 (**vedleggstabell 6**). Det var pent stille vær og låg vassføring. Lufttemperaturen var 20 °C og vasstemperaturen var 15 °C då målingane vart gjort. Tre til åtte målinger frå elvekanten og ut til midten av elva, med om lag 0,5 m avstand vart målt på kvar lokalitet, totalt 23 målepunkt. Referanse målinger vart gjort i rennande vatn over substratet. Det tok lang tid, inntil 15 minutt, å få stabile målinger på kvart målepunkt, truleg grunna ionefattig vatn.

Medianverdiar for målingane var 410 mV (gjennomsnitt 386 mV), med ein variasjon mellom 214 og 541 mV (**vedleggstabell 6, figur 14**). 26 % av målingar 5 cm nede i substratet viste redokspotensial i klassen «god habitatkvalitet (over 400 mV)» (**tabell 19**). Median reduksjonen i redokspotensial mellom vatnet over elvebotnen og 5 cm nede i substratet var 20 % (gjennomsnitt 26 %) med variasjon mellom 0 % og 59 % (**vedleggstabell 6**). 48 % av målingane viste under 20 % reduksjon i redokspotensial («god habitatkvalitet»), for 9 % av målingane var reduksjonen 20 – 30 % («moderat habitatkvalitet») og 43 % av målingane viste meir enn 30 % reduksjon i redokspotensial («dårleg habitatkvalitet») (**tabell 20**,

**figur 15).** Dei fleste av målingane som gav låge verdiar låg i område med, tett og fast botn, plantevekst og ein del organisk materiale i substratet.

**Tabell 19.** Klassifisering av habitatkvalitet basert på målingar av redokspotensial i substratet i Åreidelva 4. september 2018.

Kategori	Måleverdiar	n	%
God habitatkvalitet	>400 mV	6	26
Moderat habitatkvalitet	300-400 mV	5	22
Dårleg habitatkvalitet	<300 mV	12	52
Totalt		23	100

**Tabell 20.** Klassifisering av habitatkvalitet basert på reduksjon i redokspotensial mellom overflatevatn og substratet i Åreidelva 4. september 2018.

Kategori	Fordeling	n	%
God habitatkvalitet	< 20%	11	48
Moderat habitatkvalitet	20-30%	2	9
Dårleg habitatkvalitet	> 30%	10	43
Totalt		23	100

## HAUKÅSELVA

Det var gjennomført redokspotensialmålingar på seks stadar i Haukåselva i Bergen kommune 7. september 2018 (**vedleggstabell 7**). Det var pent vær og låg vassføring (170 l/s, sildre.no). Lufttemperaturen var 14 °C og vasstemperaturen var 14 °C då målingane vart gjort. Fem til åtte punkt frå elvekanten og ut til midten av elva, med om lag 0,5 m avstand vart målt på kvar av seks stadar, totalt 35 målepunkt. Referanseverdiene vart gjort i rennande vatn over substratet. Vatnet i Haukåselva er relativt ionerikt, og som den einaste lokaliteten vi har undersøkt stabiliserte målaren seg relativt raskt her. Målestasjon i elva målte at leiingsevne på 170 µS/cm, pH 7.4 og turbiditet 2,5 NTU i perioden då målinga vart gjort (sildre.no).

Medianverdiar for målingane var 250 mV (gjennomsnitt 271 mV), med ein variasjon mellom 94 og 517 mV (**vedleggstabell 7, figur 14**). 20 % av målingar 5 cm nede i substratet viste redokspotensial i klassen «god habitatkvalitet (over 400 mV)» (**tabell 21**). Median reduksjonen i redokspotensial mellom vatnet over elvebotnen og 5 cm nede i substratet var 51 % (gjennomsnitt 48 %), med variasjon mellom 1 % og 82 % (**vedleggstabell 7, figur 14**). 17 % av målingane viste under 20 % reduksjon i redokspotensial («god habitatkvalitet») og 83 % av målingane viste meir enn 30% reduksjon i redokspotensial («dårleg habitatkvalitet») (**tabell 22, figur 15**). Ved målingane valde vi ut område der det står eller har stått mykje vaksne muslingar. Dette er antatt å vere dei beste habitata til elvemuslingen i elva. Sjølv her indikerer målingane generelt dårlig habitatkvalitet, men her finst enkelte små flekkar der målingane indikerer betre habitatkvalitet.

**Tabell 21.** Klassifisering av habitatkvalitet basert på målingar av redokspotensial i substratet i Åreidelva 4. september 2018.

Kategori	Måleverdiar	n	%
God habitatkvalitet	<300 mV	7	20
Moderat habitatkvalitet	300-400 mV	5	14
Dårleg habitatkvalitet	>400 mV	23	66
Totalt		35	100

**Tabell 22.** Klassifisering av habitatkvalitet basert på reduksjon i redokspotensial mellom overflatevatn og substratet i Åreidelva 4. september 2018.

Kategori	Fordeling	n	%
God habitatkvalitet	< 20%	6	17
Moderat habitatkvalitet	20-30%	0	0
Dårleg habitatkvalitet	> 30%	29	83
Totalt		35	100


## OPPSUMMERING

Målingar av redokspotensial frå seks elvar med elvemusling i Hordaland viste til dels store skilnader (**figur 14, figur 15**). Ei vurdering av nedbørfelt til dei ulike elvane og aktivitetar i desse tilseier at tilstanden skulle vere dårlegast i Haukåselva. Her er travbane, landbruksaktivitetar, ulik næringsverksemnd osv., som påverkar elva (Johnsen mfl. 2018). I følgje nevina.no (februar 2019) er 9 % av nedbørfeltet til Haukåselva urbant og 5 % dyrka mark. Dei fem andre elvane, som er med i denne undersøkinga, har lite eller ingen busetnad i nedbørfeltet oppstraums der elvemusling lever og der målingane er gjort. Fjordabekkjen har 4 % dyrka mark i feltet, dei andre under 1 % dyrka mark.

Innsjøen oppstraums Åreidelva er drikkevatn og blir dermed fråført ein del vatn. Tilsvarande vert det teke ut ein del vatn til oppdrettsanlegg frå Femangerelva. Fråføring av vatn fører til lågare vassføring. Utspiling av partiklar og organisk materiale kan då verte redusert. Dette kan redusere vassgjennomstrøyminga i elvebotnen. Det kan også føre til auka nedbryting av organisk materiale i elvebotnen. Begge desse forholda kan føre til redusert oksygeninnhald i elvebotnen.

Resultata viser at habitatkvalitet basert på redokspotensial var klart dårlegast i Haukåselva der berre rundt 20 % av målingane gav verdiar i klassen «god habitatkvalitet» (**figur 14, figur 15**). Åreidelva kom ut som elva med dei nest lågaste målingane, men desse var likevel klart høgare enn i Haukåselva (**figur 14, figur 15**). Her vert som nemnt ein del vatn fråført til vassverk, og den vedvarande låge vassføringa i elva sommaren 2018 kan ha ført til lite utspiling av organisk materiale frå elva. Oppsamla organisk materiale som vert brote ned kan føre til låge oksygeninnivå.


Habitatkvaliteten i Skjelåna basert på redokspotensialmålingar var målt til å vere litt betre enn Åreidelva (**figur 14, figur 15**). Kvifor Skjelåna ikkje har like gode målingar som dei tre beste har vi ingen forklaring på. Vi ser ikkje noko i nedbørfeltet som kan forklare denne skilnaden mellom Skjelåna og dei tre med høgaste verdiar. Der har rett nok vore litt hogst i nedbørfeltet siste åra, men vi observerte ikkje spor etter dette i elva. Best habitatkvalitet i elvebotnen vart målt i Fossåa, Femangerelva og Fjordabekkjen (**figur 14, figur 15**).



**Figur 14.** Medianverdi for målingar av redokspotensial (venstre) og målingar av median reduksjon (%) i redokspotensial mellom rennande vatn og elvebotn i seks elvar med førekommst av elvemusling. Femangerelva og Fossåa vart målt i 2014 medan dei andre vart målt i 2018.

Berre Haukåselva kjem ut med ei samla vurdering som tilseier at habitatkvaliteten er dårlig. Målingane svarar derfor godt til forventningane vi hadde før vi målte. Åreidelva, og Skjelåna hadde klart fleire målingar i klassen «god habitatkvalitet» men også mange som viste «dårlig habitatkvalitet». I Fossåa, Femangerelva og Fjordabekkjen var det dominans av målingar i klassen «god habitatkvalitet».

Målingane frå elvane viser at det kan vere stor variasjon mellom målepunkta. Sjølv der målingane generelt viser låge verdiar kan enkeltmålingar gje verdiar i klassen «god habitatkvalitet». Tilsvarande kan enkeltmålingar gje verdiar i klassen «dårlig habitatkvalitet» der redokspotensial generelt er høgt. Målingane med låge verdiar er vanlegvis gjort der det har samla seg organisk materiale, nær land eller i bakevjer.



**Figur 15.** Andelar (%) av redokspotensialmålingar som kom i klassane «god habitatkvalitet» (raud), «moderat habitatkvalitet» (gul) og «dårlig habitatkvalitet» (raud) i dei seks elvane der vi har gjort målingar. Figuren til venstre viser vurdering basert på absolutte verdiar, medan verdiar til venstre viser verdiar basert på reduksjon i redokspotensial mellom frie vassmassar og 5 cm nede i botnsubstratet. Femangerelva og Fossåa vart målt i 2014 medan dei andre vart målt i 2018. Sjå vedleggstabell 8 for verdiar.

## OVERSIKT OVER INNSAMLA DNA PRØVAR AV ELVEMUSLING I HORDALAND

Analysar av DNA kan vere eit kraftfullt verktøy for å få meir kunnskap om artar og bestandar, og kan vere av stor nytte om ein vil forvalte desse på beste måte. Denne vitskapen er i sterk utvikling, og moglegheitene i framtida er uante. Det viktigste no er å sikre DNA prøvar frå ulike bestandar, spesielt dei som kan stå i fare for å gå tapt. Om ein ikkje har DNA frå desse vil ein ikkje kunne få fram kunnskapen som framtidige metodar truleg vil gje oss.

Det er her presentert ei oversikt over DNA-prøvar av elvemusling frå Hordaland ved utgangen av 2018. Prøvar er samla inn av Norsk Institutt for Naturforskning (NINA) eller Rådgivende Biologer (RB) (Kålås & Karlsson 2018), men DNA er ekstrahert og lagra i ultrafrysar hjå NINA.

**Tabell 23.** Oversikt over DNA-prøvar frå elvemusling samla inn frå ulike vassdrag og bestandar i Hordaland, ved utgangen av 2018

Lokalitet	Kommune	År	Antall	Vertssart	Prøvar tatt av
Haukåselva	Bergen	2012	83/30	aure	NINA/RB
Sørelva	Etne	2018	15	antatt laks	RB
Fjordabekkjen	Fitjar	2018	65	aure	RB
Apalvågelva	Fjell	2018	2	antatt aure	RB
Sundfjordelva	Fusa	2018	65	aure	RB
Oselva	Os		30	laks	NINA
Døsjaelva	Os		53	aure	NINA
Loneelva	Osterøy		40	laks	NINA
Svenheimselva	Osterøy		40	aure	NINA

Vi kjenner til seksten elvar/vassdrag med elvemusling, men i Loneelva på Osterøy lever arten både ovanfor lakseførande strekning (Svenheimselva) og på lakseførande strekning, og dette er truleg to bestandar med høvesvis laks og aure som vert for muslinglarvene. Om dette er rett kjenner vi til sittens bestandar med elvemusling i Hordaland. Av desse er det samla inn prøvar av ni bestandar. I tillegg vart det samla inn ca. 60 stammusling frå Femangerelva, Fusa, til muslinganlegget i Austevoll i 2018, og av desse vil det bli tatt DNA-prøvar. Det gjenstår då sju bestandar av elvemusling som det ikkje er sikra DNA frå.

For nokre av elvane der det er samla inn DNA er det få prøvar. Førekomsten av musling, t.d. i Apalvågelva er svært fatalig, og det er truleg ikkje fleire individ å finne enn dei det alt er teke prøvar av. For dei fleste andre bestandane er det truleg, om nødvendig, råd å få tak i fleire prøvar om ein set inn nok innsats.

Når det er sikra prøvar frå alle eller dei fleste vassdraga vil ei samla analyse av materialet kunne vere avklarande med tanke på forvaltning av bestandane. Det er ikkje usannsynleg at nokre av bestandane i Hordaland skuldast utsetjingar, for kortare eller lengre tid sidan. Kunnskap om dette kan vere nyttig å ha for å forvalte bestandar på beste måte.

# STATUS ELVEMUSLING I HORDALAND 2018

Førre statusrapport for elvemusling i Hordaland er datert 2012 (Kålås 2012). Det er etter den tid oppdaga fire nye førekommstar av elvemusling. Dette er Fjordabekkjen i Fitjar i 2013 (Kålås 2013), i Døsjaelva i Os (Kålås 2015), Rørvikelva i Kvam 2015 (Kålås 2016) og Sundfjordelva i Fuså i 2018 (denne rapporten). Dette er førekommstar som tidlegare ikkje har vore dokumentert i litteraturen, men det er meldt inn at det har førekommme elvemusling i ei eller fleire elvar til Dåfjorden (Kålås mfl. 1995), og Fjordabekkjen er truleg blant desse.

I 2015 avdekkja undersøkingar i regi av Sweco at det framleis levde elvemusling i Sørelva i Etne (Sweco 2016). Denne bestanden var antatt utdøydd (Larsen 2005). Det er også gjort nye undersøkingar og har komme til ny informasjon om kjente førekommstar av elvemusling i Hordaland, og det er derfor på tide med ein ny fastsetjing av status. Vi oppsummerer derfor kort kunnskapen om bestandar av elvemusling basert på eksisterande dokumentasjon.

For oppsummering av Femangerelva, Sundfjordelva og Fjordabekkjen, sjå kapittel om inventering i denne rapporten. Dei andre kjende lokalitetane med elvemusling er omtalt her. For referansar om historisk dokumentasjon av muslingbestandar som er nemnt i teksten, sjå eige kapittel om dette.

## HAUKÅSELVA I BERGEN KOMMUNE

Haukåselva har ein bestand av elvemusling som er kjent tilbake til 1600-talet. Vassdraget er no sterkt påverka av ulike aktivitetar i nedbørfeltet, og habitatet til elvemusling er negativt påverka av dette. Det vart registrert massedød på vaksen elvemusling sidan sommaren 2017, og status eit år seinare var at over 80 % av vaksenbestanden hadde gått tapt i løpet av siste året. På trass av alle negative påverknader vart det likevel påvist at her har vore rekrytting av elvemusling i løpet av dei siste 20 åra. Nye undersøkingar og oppsummering av all kunnskap vi har om elva vart gjort i 2018 (Johnsen mfl. 2018, Kålås & Hellen 2018). Vi viser til desse rapportane for detaljert informasjon om tilstanden til elvemuslingen i Haukåselva, og summerer her opp sentrale data for bestanden i tabells form (**tabell 24**).

Grunna pågåande høg dødelegheit var bestanden i ein ikkje avklart situasjon då den sist vart undersøkt i 2018, og klassifisering og indikatorverdi for bestanden gjev truleg ikkje eit rett bilet av tilstanden. Av tekniske grunnar har den store dødelegheita på vaksne individ ført til at bestanden truleg kjem i betre tilstandsklasse enn det som er reelt (**tabell 24**).

**Tabell 24.** Oppsummering av data for bestanden av elvemusling i Haukåselva. Sjå metodebeskriving for bakgrunnen til kategoriseringa. Verdiar er basert på teljing i juni 2018 og nokre ekstra teljingar fram til september 2018 (Kålås & Hellen 2018). Det er registrert fleire døde etter dette (Håvard Bjordal, Pers. komm.).

Tema	Verdi	Merk
Utbreiing	1,5 km	Midtre delar av elva
Antall individ	300 / 600	På overflata/totalestimat
Tettleik ind/m <sup>2</sup>	0,1 / 0,2	På overflata/totalestimat
Gjennomsnittslengde ± s.d.	-	
Minste musling observert	9 mm	Juni 2018
Andel < 20 mm	-	
Andel < 50 mm	-	
Vertsart	Aure	
Klasse	Ikkje berekna	Uavklart situasjon
Naturindeks indikatorverdi	0,8 «Livskraftig?»	Usikker, sjå tekst
Datagrunnlag per.	Godt september 2018	

Det er målt redokspotensialmålingar i elva i 2018. Målingane indikerte at habitatkvaliteten i elvebotnen generelt var dårleg (sjå kapittel om redokspotensialmålingar).

Det er sett ut unge muslingar frå muslinganlegget i Austevoll i 2016 og 2017. For detaljar om dette sjå Jakobsen (2019).

## ÅREIDELVA I BØMLO KOMMUNE

Bestanden med elvemusling i Åreidelva finst dokumentert i litteraturen først på 1990-talet (sjå del om historisk kjente førekommstar). Ved undersøking i 2010 vart det funne ein fåtalig bestand, med relativt små og unge individ (Kålås 2012). Ulike klassifiseringsmetodar plasserer bestanden både i klassen «sannsynlig levedyktig» og «ikke livskraftig» (**tabell 25**). Bestanden er dermed i en mellomklasse der det er uavklart om den klarar seg sjølv eller er på veg mot utrydding, om situasjonen ikkje betrar seg. Ved ei synfaring sommaren 2016 var vassføringa svært låg, og tilhøva for observasjonar var gode. Det vart då observert meir musling enn i 2010, og også fleire små muslingar (Kålås 2018). Dette indikerer at bestanden har betra seg, men grundigare undersøkingar må til for å avklare dette. Vurderinga er tilstand er derfor usikker for denne elva.

**Tabell 25.** Oppsummering av data for bestanden av elvemusling i Åreidelva. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,25 km (1 poeng)	
Antall individ	27/ 50-75	Observert/bestandsestimat
Tettleik ind/m <sup>2</sup>	0,03	På overflata
Gjennomsnittslengde ± s.d.	67 ± 16	(n=19)
Minste musling observert	38 mm	
Andel < 20 mm	0 %	
Andel < 50 mm	16 %	
Vertsart	Aure	
Klasse	Klasse II (totalt 11 poeng)	«Sårbar» «sannsynlig levedyktig»
Naturindeks indikatorverdi	0,6	«Ikke livskraftig»
Datagrunnlag per.	Godt 2012	

Det er målt redokspotensialmålingar i elva i 2018. Dette indikerte at habitatkvaliteten i elvebotnen generelt var god (sjå kapittel om redokspotensialmålingar).

## SØRELVA I ETNE KOMMUNE

Bestanden av elvemusling i Etnevassdraget er dokumentert alt på slutten av 1800-talet (Vibe 1896). Undersøkingar tidleg på 2000-talet indikerte at bestanden var tapt (Larsen 2005, Kålås 2012), men ved undersøkingar i Sørelva i samband med vasskraftrevisjon i vassdraget vart det funne 15 elvemusling i 2015 og 2016 ( Sweco 2016). Det er ikkje undersøkt for små elvemuslingar i elvebotnen, og sidan slike data manglar er vurderingane mangelfulle med tanke på andelar av små elvemuslingar (**tabell 26**). Elva er stor og uoversiktleg, og heile elvestrekninga er heller ikkje undersøkt. Det er ikkje venta å finne omfattande rekruttering av elvemusling dei siste tiåra eller større mengder vaksne elvemusling, men grunna manglar i datagrunnlaget er vurderingane likevel litt usikre.

**Tabell 26.** Oppsummering av data for bestanden av elvemusling i Sørelva i Etnevassdraget. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	Ca 4 km	
Antall individ	15	Observerert
Tettleik ind/m <sup>2</sup>	< 0,01	Observerert
Gjennomsnittslengde ± s.d.	109 ± 20 mm	n=15
Minste musling observert (mm)	49	
Andel < 20 mm	-	
Andel < 50 mm	-	
Vertsart	-	Ikkje avklart / laks ?
Klasse	Klasse I (6 poeng)	«truet» og «liten levedyktighet»
Naturindeks indikatorverdi	0,2	«snart forsvunnet»
Datagrunnlag per.	Middels godt i 2016	

## APALVÅGELVA I FJELL KOMMUNE

Førekomsten av elvemusling i Apalvågelve i Fjell kommune var ikkje kjent før det kom meldingar om denne i samband med ein utbyggingsplan tidleg på 2000-talet (Kålås & Johnsen 2009). Ved DNA-prøvetaking av elvemusling i elva sommaren 2018 vart det funne to elvemuslinger i elva (Kålås & Karlsson 2018). Tilbake på 1980-talet skal det ha vore observert klasar av elvemusling i elva (Kålås & Johnsen 2009). Bestanden er svært fåtalig og klassifiserast som «truet», «lite levedyktig» og «snart forsvunnet» frå vassdraget (**tabell 27**). Det er ikkje greve i elvebotnenetter unge muslinger, men det ville vere uventa om slike fanst. Vurderinga av status for elva er derfor sikker.

**Tabell 27.** Oppsummering av data for bestanden av elvemusling i Apalvågelve. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,01 km	Litt i ein høl i elva
Antall individ	2	Observerert på overflata
Tettleik ind/m <sup>2</sup>	< 0,01	
Gjennomsnittslengde ± s.d.		75 og 88 mm lange
Minste musling observert (mm)	75	
Andel < 20 mm	0 %	
Andel < 50 mm	0 %	
Vertsart	Aure?	Antatt
Klasse	Klasse I (6 poeng)	«truet» og «liten levedyktighet»
Naturindeks indikatorverdi	0,2	«snart forsvunnet»
Datagrunnlag per.	Godt sommaren 2018	



**Figur 16.** Dei to elvemuslingane i Apalvågelva i Fjell kommune som det vart tekne DNA prøvar av 14. august 2018.

## FOSSÅA I FUSA KOMMUNE

Første gang vi finn bestanden av elvemusling i Fossåa nemnt i litteraturen er på slutten av 1900-tallet. Den har likevel vore her mykje lenger. Grunneigar har fortald om ein episode, under andre verdskrig, der elva vart plyndra for elvemusling av tilreisande på jakt etter perler (Kålås 2012). Etter dette har den før så talrike bestanden ikkje tatt seg opp att. Det er no eit fåtal elvemusling att i elva, fordelt på eit område nede i elva og eit område nokre kilometer oppover (Kålås 2012). Undersøkinga som er gjort er noko mangefull sidan målingar av musling og graving i substratet manglar. Konklusjonen om at bestanden er «truert», «lite levedyktig» og «snart kan være forsvunnet» er truleg rett (**tabell 28**). Det manglar sok i elvebotnen etter unge muslingar i denne elva. Datagrunnlaget er derfor middels godt og vurderinga av status er litt usikker.

**Tabell 28.** Oppsummering av data for bestanden av elvemusling i Fossåa. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,7 km	
Antall individ	60	Observert
Tettleik ind/m <sup>2</sup>	<0,01	Observert
Gjennomsnittslengde ± s.d.	-	Ikkje målt
Minste musling observert (mm)	-	Ikkje målt
Andel < 20 mm	-	Ikkje målt
Andel < 50 mm		Ikkje målt
Vertsart	aure	
Klasse	Klasse I (6 poeng)	«truert» og «liten levedyktighet»
Naturindeks indikatorverdi	0,2	«snart forsvunnet»
Datagrunnlag per.	Middels godt i 2012	

Det vart målt redokspotensialmålingar i elva i 2014. Desse indikerte at habitatkvaliteten i elvebotnen generelt var god (sjå kapittel om redokspotensialmålingar). Det vart sett ut 37 små elvemuslingar i Fossåa frå muslinganlegget i Austevoll i 2016. Desse vart ikkje lagt i boksar, men sleppt rett i elva (Jakobsen 2019).

## HOPSELVA I FUSA KOMMUNE

Elvemuslingen i Hopselva vart først dokumentert på slutten av 1990-talet, men har truleg etablert seg naturleg i vassdraget. Bestanden var ved undersøkinga i 2010 relativt talrik, men forgubba (Kålås 2012). Status for bestanden basert på denne undersøkinga var «truet», «lite levedyktighet» og «ikke livskraftig» (**tabell 29**). Ved ei synfaring i 2016 vart det observert ein heil del små muslingar av fleire årsklassar blant dei større (Kålås 2018), og dette tyder på rekruttering dei siste ti åra. Det er truleg at ein undersøking nå ville gjeve elva høgare klasse og verdi for naturindeks, sidan det har vore naturleg rekruttering i bestanden det siste tiåret. Det er ikkje gjennomført sok i elvebotnen etter elvemusling, og grunnlaget for vurderinga er derfor middels godt.

**Tabell 29.** Oppsummering av data for bestanden av elvemusling i Hopselva. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,55 km	
Antall individ	250 / ≈ 1000	observert / bestandsestimat
Tettleik ind/m <sup>2</sup>	0,05 / 0,2	observert / bestandsestimat
Gjennomsnittslengde ± s.d.	110 ± 20	
Minste musling observert	41 mm	
Andel < 20 mm	0 %	
Andel < 50 mm	1,5 %	
Vertsart	Aure	Mest sannsynleg
Klasse	Klasse I (7 poeng)	«truet» og «liten levedyktighet»
Naturindeks indikatorverdi	0,6	«Ikke livskraftig»
Datagrunnlag per.	Middels godt i 2010	

Det vart sett ut 57 små elvemuslingar i Hopselva frå muslinganlegget i Austevoll i 2016. Desse vart ikkje lagt i boksar, men sleppt rett i elva (Jakobsen 2019).

## RØYRVIKELVA I KVAM HERAD

Det kom inn melding om elvemusling i elva i 2015 (Kålås 2016). Det har tidlegare ikkje vore kjent at her har levd elvemusling. Der levde tidlegare elvemusling i Ljoneselva, som ligg ca. 2 km lenger aust. Bestanden i Røyrvikelva er fåtalig og forgubba (**tabell 30**). Ved undersøkinga vart det ikkje greve i elvebotnen, men ei slik undersøking ville truleg ikkje gjort funn som endra på klassifisering og naturindeks for elva. Det er ikkje gjennomført sok i elvebotnen etter elvemusling, og grunnlaget for vurderinga er derfor middels godt.

**Tabell 30.** Oppsummering av data for bestanden av elvemusling i Røyrvikelva. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,6 km	
Antall individ	≈ 50	Observevert
Tettleik ind/m <sup>2</sup>	0,4	Observevert
Gjennomsnittslengde ± s.d.		92 – 104 mm lange (n=11)
Minste musling observert	92 mm	
Andel < 20 mm	0 %	Observevert
Andel < 50 mm	0 %	Observevert
Vertsart	aure	Ikkje laks i elva
Klasse	Klasse I (6 poeng)	«truet»
Naturindeks indikatorverdi	0,2	«snart forsvunnet»
Datagrunnlag per.	Middels godt i 2016	

## MJÅTVEITELVA I MELAND KOMMUNE

Bestanden i Mjåtveitelva er kjent tilbake til tidleg på 1700-talet (sjå del om historisk kjente førekomstar). Det var observert 62 store elvemuslinger i juli 2006 (Håland & Hult 2009), men ved oppfølgende undersøking i 2010 vart det ikkje funne levande vaksne muslinger (Kålås 2012). Deretter vart heile elvestrekninga der det tidlegare har vore elvemusling grundig undersøkt 21. juni 2012. Det vart teke opp tomme skal etter elvemusling som fylte tre store plastsekkar, men ingen levande muslinger vart funne. Likevel er det funne muslingerlarver på auregjeller vårane 2013, 2014 og 2018 (eigne data). Det er derfor minst ein gjenlevande voksen elevmusling i elva (**tabell 31**). Elva er grundig gjennomsøkt, og grunnlaget for vurderinga er derfor Godt. Nokre små elvemuslinger som er funne på gjeller til aure i 2013, og dyrka fram frå desse, er sett ut i Mjåtveitelva i 2017. For deltaljar om dette sjå Jakobsen (2019).

**Tabell 31.** Oppsummering av data for bestanden av elvemusling i Mjåtveitelva. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,2 km	
Antall individ	0 / <0	Observert / bestandsestimat
Tettleik ind/m <sup>2</sup>	-	
Gjennomsnittslengde ± s.d.	-	
Minste musling observert	-	
Andel < 20 mm	-	
Andel < 50 mm	-	
Vertsart	Aure	
Klasse	Klasse I (6 poeng)	«trueit»
Naturindeks indikatorverdi	0,2	«snart forsvunnet»
Datagrunnlag per.	Godt i 2018	

## OSELVA I OS KOMMUNE

Bestanden av elvemusling er kjent tilbake til 1700-talet (sjå del om historisk kjente førekomstar). Den vert undersøkt som ein del av den nasjonale overvakkinga. Første undersøking vart gjort i 2004 og den andre og førebels siste i 2012 (Larsen mfl. 2014). Her er summert opp tilstand for Oselva, men der vart også funne litt elvemusling i Søftelandselva lenger oppe i vassdraget, og enkelte individ også andre stader i øvre delar av vassdraget. Bestanden i Oselva er den klart største i Hordland, og den einaste som er i klassen «livskraftig» og «levedyktig» (**tabell 32**). Tilstanden til bestanden hadde også betra seg i perioden mellom 2004 og 2012. Det er gjennomført grundige undersøkingar i elva, og datagrunnlaget for vurderingane er derfor godt.

**Tabell 32.** Oppsummering av data for bestanden av elvemusling i Oselva. Sjå metodebeskriving for bakgrunnen til kategoriseringa. Frå undersøking i 2012 (Larsen mfl. 2014)

Tema	Verdi	Merk
Utbreiing	3,4 km	Berre Oselva
Antall individ	-/365.000	
Tettleik ind/m <sup>2</sup>	4,9	
Gjennomsnittslengde ± s.d.	110 ± 39	N=505
Minste musling observert	6 mm	
Andel < 20 mm	3 %	
Andel < 50 mm	14 %	
Vertsart	Laks	
Klasse	Klasse III (23 poeng)	«levedyktig»
Naturindeks indikatorverdi	1,0	«livskraftig»
Datagrunnlag per.	Godt 2012	

Det er sett ut eit fåtal unge muslingar frå muslinganlegget i Austevoll i øvre delar av vassdraget i 2017. For deltaljar om dette sjå Jakobsen (2019).

## DØSJAELVA I OS KOMMUNE

Førekomsten av elvemusling i Døsjaelva vart oppdaga i 2015 (Kålås 2015). Eit fåtal vaksne individ finst på eit parti eit stykke oppe i elva. Bestanden er fatalig og forgubba. Vi påviste ikkje rekruttering i elva, men det vart heller ikkje greve i elvebotnen, og dette må gjerast om status til bestanden skal vere heilt sikkert fastslått. Status til bestanden basert på noverande data er at den er «truet», med «liten levedyktighet» og at den er «snart forsvunnet» om ikkje tiltak vert sett inn (**tabell 33**). Det er ikkje søkt etter unge elvemuslingar i elvebotnen ved graving. Datagrunnlaget for vurderingane er derfor middels godt. 52 elvemusling, som er planlagt brukt som stammusling, vart samla inn frå elva og transportert til muslingstasjonen i Austevoll 3. august 2016 (eigen observasjon).

**Tabell 33.** Oppsummering av data for bestanden av elvemusling i Døsjaelva. Sjå metodebeskriving for bakgrunnen til kategoriseringa. Data frå Kålås 2015.

Tema	Verdi	Merk
Utbreiing	0,5 km	Øvre delar av elva
Antall individ	81 / 100	Overflate/ anslått bestand
Tettleik ind/m <sup>2</sup>	<0,1	Estimat
Gjennomsnittslengde ± s.d.	94 ± 6	
Minste musling observert	54 mm	
Andel < 20 mm	0 %	Ikkje gravd i botn
Andel < 50 mm	0 %	Ikkje gravd i botn
Vertsort	aure	Ikkje laks i elva
Klasse	Klasse I (6 poeng)	«truet», «liten levedyktighet»
Naturindeks indikatorverdi	0,2	«snart forsvunnet»
Datagrunnlag per.	Middels godt i 2015	

## LONEELVA I OSTERØY KOMMUNE

Førekomst av elvemusling er kjent tilbake til 1800-talet (sjå del om historisk kjente førekomstar). Bestanden nede i Loneelva lever på lakseførande strekning av elva og har laks som hovudvert for larvene sine. Ved teljinga i 2010 vart der berre funne sju vaksne muslingar (Kålås 2012). Ved svært låg vassføring i elva, 1. april 2014, kom vi ut på områder som vi tidlegare ikkje hadde undersøkt. Her vart det observert 75 elvemusling (eigen obs.). Status til bestanden er at den er «truet» og «snart forsvunnet» (**tabell 34**). Det er ikkje søkt etter unge elvemuslingar i elvebotnen ved graving. Datagrunnlaget for vurderingane er derfor middels godt.

**Tabell 34.** Oppsummering av data for bestanden av elvemusling i Loneelva. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,2 km	
Antall individ	75	Observert
Tettleik ind/m <sup>2</sup>	< 0,05	Observert
Gjennomsnittslengde ± s.d.	122 ± 11	Nesten berre gamle store
Minste musling observert	84 mm	N=41
Andel < 20 mm	0 %	Observert
Andel < 50 mm	0 %	Observert
Vertsort	Laks	
Klasse	Klasse I (6 poeng)	«truet»
Naturindeks indikatorverdi	0,2	«snart forsvunnet»
Datagrunnlag per.	Middels godt i 2014	

Det er sett ut eit stort antall unge muslingar frå muslinganlegget i Austevoll i Loneelva i 2017 og 2018. For deltaljar om dette sjå Jakobsen (2019).

## SVENHEIMSELVA I OSTERØY KOMMUNE

Svenheimselva ligg i Lonevassdraget på Osterøy, men ligg ovanfor lakseførande strekning, og har ein bestand av musling som har aure som vert for larvene sine. Bestanden er resten av den som levde i fleire elvedelar i Låstadgreina av vassdraget, der det var tett med elvemusling før silosafka gjorde sitt inntog (Kålås 2012). Status til bestanden er: «truet» og «snart forsvunnet», om ikkje tiltak vert sett inn (**tabell 35**). Det er ikkje søkt etter unge elvemuslingar i elvebotnen ved graving. Datagrunnlaget for vurderingane er derfor middels godt.

**Tabell 35.** Oppsummering av data for bestanden av elvemusling i Svenheimselva i Osterøy kommune. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,5 km	
Antall individ	85 / 150	Observerert og estimat
Tettleik ind/m <sup>2</sup>	0,2	Estimat
Gjennomsnittslengde ± s.d.	90 ± 9 mm	
Minste musling observert	63 mm	
Andel < 20 mm	0 %	Observerert
Andel < 50 mm	0 %	Observerert
Værtsart	Aure	Ovanfor lakseførande
Klasse	Klasse I (6 poeng)	«truet»
Naturindeks indikatorverdi	0,2	«snart forsvunnet»
Datagrunnlag per.	Middels godt i 2012	2012

## SKJELÅNA I SAMNANGER KOMMUNE

Bestanden i Skjelåna er truleg naturleg innvandra til elva etter istida, men vi finn ikkje omtaler av bestanden i litteraturen før på 1990-talet. Status for elva er sett frå undersøkinga i 2010 (Kålås 2012) og synfaringar i 2014 og 2016 (Kålås 2018). Ca. 800 individ er observert på overflata. Ein mangel ved undersøkingane er at det ikkje er sjekka for førekomst av elvemusling nede i elvebotnen. Ein del små muslingar vart observert ved synfaringa i 2016. Desse vart ikkje målt, og er ikkje med i vurderinga. Om sjekk av substrat blir gjort vil det truleg verte funne mindre muslingar, og klasse og naturindeks ville verte høgare enn det som no er sett. Status etter undersøkinga i 2010 var «truet» og «snart forsvunnet», men ved undersøking no ville naturindeks vere betra til 0,6 («ikke livskraftig») (**tabell 36**). Det er ikkje søkt etter unge elvemuslingar i elvebotnen ved graving. Datagrunnlaget for vurderingane er derfor middels godt.

**Tabell 36.** Oppsummering av data for bestanden av elvemusling i Skjelåna. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,25	
Antall individ	Ca 800/≈1000	Observert/estimat
Tettleik ind/m <sup>2</sup>	0,6	estimat
Gjennomsnittslengde ± s.d.	116 ± 26	n=51
Minste musling observert	53 mm	
Andel < 20 mm	0 %	Usikkert
Andel < 50 mm	0 %	Usikkert
Værtsart	aure	
Klasse	Klasse I (6 poeng)	«truet»
Naturindeks indikatorverdi	0,2	«snart forsvunnet»
Datagrunnlag per.	Middels godt i 2010	

Det vart målt redokspotensialmålingar i elva i 2018. Desse indikerte at habitatkvaliteten i elvebotnen generelt var god (sjå kapittel om redokspotensialmålingar).

Det er sett ut unge muslingar i Skjelåna frå muslinganlegget i Austevoll i 2016. For detaljar om dette sjå Jakobsen (2019).

## KVERNVIKSELVA I TYSNES KOMMUNE

Bestanden i Kvernvikselva vart oppdaga ved ei naturtypekartlegging i 2009 (Garder & Fjellstad 2011). Bestandsstatus er sett etter undersøking i 2010 (Kålås 2012). Vanskelege lysforhold gjorde at ein del musling på overflata kan vere oversett. Basert på erfaringar frå liknande stadar er det ikkje venta å finne mykje små musling i Kvernvikselva. Klassifisering som «truet» og «snart forsvunnet» (**tabell 37**), er derfor truleg rett. Det er ikkje søkt etter unge elvemuslingar i elvebotnen ved graving. Datagrunnlaget for vurderingane er derfor middels godt.

**Tabell 37.** Oppsummering av data for bestanden av elvemusling i Kvernvikselva. Sjå metodebeskriving for bakgrunnen til kategoriseringa.

Tema	Verdi	Merk
Utbreiing	0,2 km	
Antall individ	51 /150	Observervert /bestandsestimat
Tettleik ind/m <sup>2</sup>	0,8	Basert på estimat
Gjennomsnittslengde ± s.d.	-	Berre fåtal muslingar målt
Minste musling observert	90 mm	
Andel < 20 mm	0 %	Observervert
Andel < 50 mm	0 %	Observervert
Vertsart	Aure	
Klasse	Klasse I (6 poeng)	«truet»
Naturindeks indikatorverdi	0,2	«snart forsvunnet»
Datagrunnlag per.	Middels godt i 2012	

## GENERELT OM VASSKVALITET I VASSDRAGA MED ELVEMUSLING

Det finst ein del målingar av vasskvalitet, som indikerer kor godt livsmiljøet er for elvemusling i dei ulike vassdraga.

## PARTIKLAR OG NÆRINGSTILFØRSLAR

Tilstanden er dårlegast i **Mjåteitelva** og **Haukåselva**, der det både er store tilførsler av mudder, partiklar og næringsstoff frå dyregjødsel og kloakk (Kålås & Johnsen 2012, Eilertsen mfl. 2017). Partikkkel- og næringstilførsler kan også vere noko høge i **Døsjaelva** (Eilertsen mfl. 2017). **Lonevassdraget** er mindre påverka av mudder og partiklar, men der er mykje landbruk og kloakkar tilhøyrande spreidd busetnad som gjer at næringssverdiar er høge i periodar (Eilertsen mfl. 2017).

Det er dermed fire vassdrag, med bestandar av elvemusling, som basert på kunnskap om vasskvalitet og nedbørfelt, har redusert miljøkvalitet for elvemusling grunna næringstilførslar og i nokre tilfelle partikkkelureining.

I nedbørfeltet til **Sørelva** i Etne er det også mykje landbruk, og i periodar med låg vassføring kan næringsskonsentrasjonar truleg bli litt høge, men normaltilstanden er truleg at elva er klår og næringfattig. Elva har tidlegare vore noko sur, men dette har betra seg mykje. Eit fåtal vassprøvar tekne i Litledalsvatnet i samband med revisjon av kraftanlegget tyder på at vasskvaliteten Sørelva er kalkfattig og næringfattig (Sweco 2016).

**Oselva** har ein del busetnad og landbruk i feltet, men fører også godt med vatn, som tynner næringstilførslar. Det er også gjort ein innsats både med kloakksanering og med tiltak i landbruket for å redusere skadelege påverknader (Eilertsen mfl. 2017).

## VASSVERK, FISKEOPPDRETT OG VASKRAFT

Finnåsvatnet på Bømlo som er kjelda til **Åreidelva** er drikkevasskjelde. Vassføringa i elva er truleg redusert grunna dette, og det kan vere at elva no ikkje vert spylt gjennom på same måten som før etableringa av vassverket. Den sjølvreinsande evna til elva kan derfor vere redusert. Om det samlar seg opp organisk materiale i elvebotnen, kan dette føre til auka oksygenforbruk, og dermed därlegare livsmiljø, spesielt for dei yngste og mest sårbare elvemuslingane. Ved målingar av redokspotensial i 2018 (sjå kapittel for dette) var verdiane i elvebotnen i Åreidelva lågare enn venta. Dette var målingar gjort etter ein svært tørr sommar, så det kan ha vore ein spesiell situasjon. Det er uansett viktig å vere merksam på at fråføring av vatn kan ha endra miljøet for elvemusling i elva. **Apalvågelva** i Fjell kommune har også vassverk i nedbørfeltet, og får fråført mykje vatn, så den same problemstillinga er aktuell her. I kjelda til **Femangerelva** og **Sundfjordelva** i Fusøya vert det teke ut vatn til fiskeoppdrettsanlegg. **Hopselva** i Fusøya og **Sørelva** i Etne er påverka av vasskraftregulering. Vatn vert her ikkje ført vekk frå strekninga med elvemusling, men vassføringa er endra i forhold til tidlegare. I fire vassdrag er der dermed fråføring av vatn, som kanskje kan påverke den sjølvreinsande evna til elva, og i to elvar har endra vassføringsregime grunna vasskraftregulering.

## ANDRE ELVAR

Dei resterande fem elvane som er: Fjordabekkjen, Fossåa, Røyrvikelva, Skjelåna og Kvernavikselva har lite eller ingen busetnad og landbruk, eller andre tiltak i nedbørfeltet, og er derfor lite utsett for moglege skadelege effektar av dette.

## KONKLUSJON

## NOVERANDE STATUS OG BEHOV FOR TILTAK

Det finst 16 vassdrag i Hordaland med førekomstar av elvemusling. I Lonevassdraget er det to bestandar av elvemusling, elles er der truleg berre ein bestand i kvart vassdrag. Vi kjente ved utgangen av 2018 til 17 bestandar av elvemusling i Hordaland, og vi har namnet på elleve elvar der det skal ha vore elvemusling, men der bestanden er sikkert eller sannsynlegvis tapt (**figur 17**).

Berre **Oselva** har ein stor livskraftig bestand av elvemusling som hadde rekruttert godt fram til førre undersøking i 2012 (Larsen mfl. 2014). Her treng ein berre overvake at tilstanden held seg god, og passe på at her ikkje skjer uheldige tiltak eller hendingar i nedbørfelt og elvestreng.

Bestandane av elvemusling i **Hopselva** i Fusøya og **Fjordabekkjen** i Fitjar har vist positive trekk dei siste åra. Bestandane består av nokre tusen vaksne elvemusling, og der ser ut til på ha vore litt rekruttering siste åra. Desse bestandane kan ein avvente tiltak og heller følgje med om den positive trenden varar.

Åtte vassdrag i Hordaland med elvemusling har no tilsynelatande tilfredsstillande habitatkvalitet, men har svært fåtalige bestandar. Det kan vere at dei er så fåtalige at dei ikkje klarar å bygge seg opp att. Eit tiltak som då kan fungere er å ta inn stammusling til anlegg og la desse formeire seg opp her. Ein kan så setje små muslingar tilbake til elv når desse har blitt ca. 4 mm lange. Dei er då robuste og vil overleve godt. Desse elvane er: **Røyrvikelva** i Kvam, **Åreidelva** i Bømlo, **Kvernavikselva** i Tysnes, **Sørelva** i Etne, **Skjelåna** i Samnanger, **Sundfjordelva**, **Fossåa** og **Femangerelva** i Fusøya.

I tre vassdrag er det behov både for oppformering av elvemusling, men også tiltak for å forbetre livsmiljøet for elvemusing. Dette er: **Haukåselva** i Bergen, **Døsjaelva** i Os og **Loneelva med sideelvar** på Osterøy.

Dei to siste kjente elvane med elvemusling i Hordland er **Apalvågelva** i Fjell og **Mjåtvitelva** i Meland. Her er bestandane svært fåtalige og det trengs omfattande tiltak for å betre livsmiljøet.

Dei to sistnemnte førekommstane står i størst fare for å verte utrydda, og berre tre, Oselva, Hopselva og Fjordabekkjen, er venta å overleve meir enn eit par tiår dersom ikkje tiltak vert sett i verk.

Det er i denne rapporten ikkje vidare vurdert om fråføring av vatn eller endra vassføringsregime, i dei elvane der dette skjer, kan ha negative effektar på nokon av elvemuslingbestandane.

## TILTAK FOR Å BERGE BESTANDAR AV ELVEMUSLING

Dei tiltak for å berge bestandar av elvemusling som her i hovudsak er nemnt er:

- tiltak som forbetrar habitatet i opphavslokalitet
- innhenting av stammusling som blir oppformert og tilbakeført til opphavslokalitet

Nødvendige habitatforbetrande tiltak i dei ulike lokalitetane vil vere ulike. Generelt er reduserte utslepp av partiklar og næringsstoff som fosfor og nitrogen dei viktigast. Nokre stader kan det vere nytte i tiltak som bører på skadelege fysiske inngrep i elvestreng eller nedbørfelt.


Om ein ikkje er sikker på at habitatkvaliteten er god nok, eller risiko for episodar med skadeleg miljøkvalitet er høg kan ein reduserer risiko ved også å setje ut muslingar i reservelokalitet. Då vil bestanden vere sikra om den skulle bli radert ut i ein av lokalitetane. Eksempel på aktuelle stadar for å sikre utsette bestandar kan vere nærliggjande elvar som har hatt elvemusling som har gått tapt, men der miljøkvaliteten no igjen er tilstrekkeleg god.

## BEHOV FOR VIDARE KUNNSKAP

For fleire av vassdraga med elvemusling i Hordaland er det no lenge sidan det er gjort undersøkingar av bestanden. Tidlegare undersøkingar har fleire stader også hatt eit begrensa omfang. Den største mangelen er kunnskap om musling i elvebotnen. Det er her ein finn dei fleste unge muslingane. Metodar for å klassifisere status til bestandar av elvemusling treng informasjon om storleik på minste musling og andelar av musling mindre enn 20 mm og mindre enn 50 mm. I fåtalige bestandar treng ein grave opp store areal for å få gode mål for dette. Mange av bestandane i Hordaland manglar gode mål for dette, og kunne trenge grundigare inventeringar i løpet av dei neste åra.

Eit viktig tilskot i kunnskapsgrunnlaget når ein skal forvalte bestandar av elvemusling ville vere analysar av DNA. Ein kunne då fått sikrare kunnskap om bestandane, korleis dei er beslektta med andre bestandar av elvemusling, og om dei eventuelt kan vere innført til lokalitetten frå annan kjent bestand i nærområdet. Tiltak for å berge bestandar kan vere ressurskrevjande. Kunnskap om slektskap mellom bestandar kan vere viktig når ein skal prioritere korleis ressursane best kan nyttast.

Det er ikkje endeleg avklart kor god kontroll vi har over førekommstar av elvemusling i Hordaland. Ein relativt ny metode, der en siler vassprøvar og analyserer for DNA-fragment (miljø-DNA), kan påvise artar som lever i vatnet (Miljødirektoratet 2018). Denne metoden kan truleg vere til nytte ved i kartleggingsarbeidet i Hordaland. Spesielt i større vassdrag der manuelle søk vil vere svært arbeidskrevjande. Det finst få målingar av vasskvalitet frå fleire av vassdraga med elvemusling. Det hadde vore ei styrke for kunnskapsgrunnlaget om elvemuslingen sine leveområde om det hadde vorte analysert fleire vassprøvar frå nokre av vassdraga med elvemusling i Hordaland.



**Figur 17.** Elvemuslingbestandar som framleis finst (grønn), bestandar som mest sannsynleg eller sikert er tapt (raud) og bestand med ukjent status (grå). Ein bestand frå litteraturen (Aalandselven i sørre Bergenhus amt) har vi ikkje sikker lokalisering av, og denne er derfor ikkje med på kartet. Figuren viser status ved utgangen av 2018. Sjå vedleggstabell 9 for UTM-koordinat til lokalitetane.

## KLASSIFISERING AV BESTAND OG NATURINDEKS

Det er nytta to metodar for å klassifisere bestandar av elvemusling i denne rapporten. Dette er ein metode for samla vurdering av tilstand, verneverdigheit og levedyktigheit (Larsen & Hartvigsen 1999) og ein metode for berekning av naturindeks (Miljødirektoratet 2018). I begge metodane er rekruttering viktige indikatorar for tilstand. Sjå metodekapittel for omtale av desse.

**Tabell 38.** Klassifisering av tilstand og levedyktigheit til bestandar av elvemusling. Sjå metodekapittel for detaljar.

Lokalitet	År for status
Klasse III – «Levedyktig» (18-36 poeng)	
Oselva – Os kommune (23 p)	2012
Klasse II – «Sårbar» - «Sannsynlig levedyktig» (8-17 poeng)	
Fjordabekkjen – Fitjar kommune (17 p)	2018
Åreidelva – Bømlo kommune (11 p)	2012
Klasse I – «Truet» - «liten levedyktighet» (6-7 poeng)	
Femangerelva – Fusa kommune (7 p)	2018
Hopselva – Fusa kommune (7 p)	2012
Sørelva – Etne kommune (6 p)	2016
Apalvågen - Fjell kommune	2018
Fossåa – Fusa kommune	2012
Sundfjordelva – Fusa kommune	2018
Røyrvikelva – Kvam herad	2016
Mjåtveitelva – Meland kommune	2018
Døsjaelva – Os kommune	2015
Loneelva – Osterøy kommune	2014
Svenheimselva – Osterøy kommune	2012
Skjelåna – Samnanger kommune	2012
Kvernavikselsva – Tysnes kommune	2012
Ustabil tilstand – Ikkje grunnlag for vurdering	
Haukåselva – Bergen kommune	2018
Ukjent status	
Bekk Særvoll – Os kommune	ca. 1920
Aalandselva - Ukjent lokalitet	ca. 1900
Sannsynleg tapt	
Apeltunelva – Bergen kommune	2012
Arnaelva – Bergen kommune	2012
Fanaelven – Bergen kommune	2018
Nesttunelva – Bergen kommune	2012
Sørelva, Skjelbreid -Fusa kommune	2012
Ljoneselva – Kvam herad	2012
Fosseelva – Meland kommune	2012
Elv frå Bjørnavatnet – Os kommune	2012
Reisoelva -Tysnes kommune	2012

I hovudsak gjev desse metodane eit mål på tilstanden til bestandar som samsvarar godt med det inntrykket ein har etter å ha følgt bestandane i eit tiår. I eit tilfelle i Hordaland ser metoden likevel ut til å feile. Bestanden i Haukåselva i Bergen kommune har opplevd massedød sidan sommaren 2017. Ein høg andel av vaksne muslingar har døydd. Unge musingar ser ikkje ut til å ha døydd same omfang. Dette har ført til at bestanden har fått auka andelen unge muslingar, og dermed ha kome i ein betre tilstandsklasse. I slike tilfelle må ein sjå på data og gjere sine eigne vurderingar. Haukåselva er i ein krisetilstand og krisa må vere over før ein kan setje ein tilstand for bestanden.

For nokre bestandar i Hordaland kan det hende at tilstand og levedyktigheit er sett litt for låg, sidan det ikkje er gjennomført tilstrekkeleg omfattande sok i elvebotnen etter unge muslingar i fleire av elvane. I ein fåtalig bestand må store vidder undersøkast om ein skal få eit godt anslag for kor stor andel av muslingane som er under 5 og 2 cm lange. Dette vil vere svært arbeidskrevjande.

**Tabell 39.** Naturindeks til bestandar av elvemusling i Hordaland. Sjå metodekapittel for detaljar.

**OBS:** Vaksne individ av elvemusling i Haukåselva har hatt svært stor dødelegheit sidan 2017, og bestanden er i ein ustabil situasjon. Indikatorverdi er truleg misvisande. For klasse 6 «Dokumentert tapt» er dette meir eller mindre sikkert. Ein kan ikkje dokumentere at ein bestand er tapt, men ein kan sannsynleggjere dette. Sjå teksten for detaljar.

Lokalitet	År for status
	Klasse 1 - indikatorverdi 1 – «livskraftig»
Oselva - Os kommune	2012
	Klasse 2 – Indikatorverdi 0,8 – «livskraftig ?»
Haukåselva – Bergen kommune	2018
	OBS !
	Klasse 3 – Indikatorverdi 0,6 – «ikke livskraftig»
Areidelva – Bømlo kommune	2012
Fjordabekkjen – Fitjar kommune	2018
Femangerelva – Fusa kommune	2018
Hopselva – Fusa kommune	2012
	Klasse 4 – Indikatorverdi 0,4 - «utdøende»
Ingen	
	Klasse 5 – Indikatorverdi 0,2 - «snart forsvunnet»
Sørelva – Etne kommune	2016
Apalvågen -_Fjell kommune	2018
Fossåa – Fusa kommune	2012
Sundfjordelva – Fusa kommune	2018
Røyrvikelva – Kvam herad	2016
Mjåtveitelva – Meland kommune	2018
Døsjaelva – Os kommune	2015
Loneelva – Osterøy kommune	2014
Svenheimselva – Osterøy kommune	2012
Skjelåna – Samnanger kommune	2012
Kvernnavikselva – Tysnes kommune	2012
	Klasse 6 – Indikatorverdi 0 - «dokumentert tapt»
Bekk Særvoll – Os kommune	-
Aalandselva- Ukjent lokalitet	-
Apeltunelva – Bergen kommune	2012
Arnaelva – Bergen kommune	2012
Fanaelven- Bergen kommune	2018
Nesttunelva – Bergen kommune	2012
Sørelva, Skjelbreid – Fusa kommune	2018
Ljoneselva – Kvam herad	2012
Fosseelva – Meland kommune	2012
Elv frå Bjørnavatnet – Os kommune	2012
Reisoelva -Tysnes kommune	2012

## REFERANSAR

- Bjordal, H. 2002. Elvemusling i Haukåselva, Åsane, Bergen kommune. Rapport Bergen kommune, Miljøseksjonen.
- Dolmen, D. & E. Kleiven. 1997. Elvemuslingen Margaritifera margaritifera i Norge 2. - Vitenskapsmuseet Rapport Zool. Ser. 1997-2.
- Eilertsen, L., B.A. Hellen, M. Kambestad, S. Kålås & G.H. Johnsen. 2017. Kartlegging av forurensningskilder i fire vassdrag med elvemusling i Hordaland. Forslag til inndeling av risikosoner. Rådgivende Biologer AS, rapport 2438, 37 s.
- Fossøy, F., S. Dahle, L. B. Eriksen, M. H. Spets, S. Karlsson, T. Hesthagen. 2017. Bruk av miljø-DNA for overvåking av fremmede fiskearter - utvikling av artsspesifikke markører for gjedde, mort og ørekyst. NINA Rapport 1299.
- Henrikson, L., Bergström, S.-E., Norrgrann, O. & Söderberg, H. 1998. Flodpärlmusslan i Sverige - dokumentation, skyddsvärde och åtgärdsförslag för 53 bestånd. - Del II i Eriksson, M.O.G., Henrikson, L. & Söderberg, H., red. Flodpärlmusslan i Sverige. Naturvårdsverket, Rapport 4887.
- Geist, J. & K. Auerswald. 2007. Physiochemical stream bed characteristics and recruitment of the freshwater pearl mussel (*Margaritifera margaritifera*). Freshwater Biology 52, s 2299 - 2316.
- Hanssen, O. 1920. Brev til James A. Grieg. Bergens Museum.
- Hanssen, O. 1929. Ei gammal sak om perlefangst i Oselvi. Naturen vol 53: 255-256.
- Helland, A. 1921. Norges land og folk. Topografisk-historisk-statistisk beskrivelse. Søndre Bergenhus Amt. Første og andre del. H. Aschehoug & co.
- Håland, A. & B. Hult. Næringsområde Dalstø – Mjåtveit, Meland kommune. Vurderinger av virkninger på bestand av rødlistet art – elvemusling – i Mjåtveitelva. Aktuelle avbøtende tiltak. NNI rapport nr 214, 19 s.
- Jakobsen, P. (red). Samlerapport om kultivering og utsetting av elvemusling 2018. Universitetet i Bergen Rapport 113 s.
- Johannessen, M. H. 2003. «een Dehl Skjønne Pærle Elver» - om perlefiske og perle-Inspecteur Abraham Nordmand i Bergen stift 1719-1724. Åsabuen nr 4. 2003, s 60-73 s.
- Johnsen, G. H., Kålås, S. & Bjørklund, A. E. 1996. Kalkingsplan for Stord kommune. Rådgivende Biologer AS, rapport 187, 33 s.
- Johnsen, G. H., S. Kålås & I. Wathne 2018. Status for elvemusling i Haukåsvassdraget 2017. Rådgivende Biologer AS, rapport 2629, 34 sider.
- Kambestad, A., V. Bjerknes, T. E. Braandrud, A. Fjellheim, K. Hegna, A. Henriksen, A. Hobæk, G. H. Johnsen, G. G. Raddum, Ø. Vasshaug & P. Vikse 1995. Rammeplan for kalkingsvirksomheten i Hordaland 1994-2005. Fylkesmannens miljøvernnavdeling rapport 7-1995 133 s.
- Kleiven, E. & D. Dolmen. 2013. eldre opplysninger om elvemusling etter Joh. O. Simonnæs Del IV. Fauna Vol 66: 3-4, s 78-86.
- Kraft, J. E. 1830. Topographisk-statistisk beskrivelse over kongeriget Norge Volum 4. Det vestenfjeldske Norge.
- Krüger, H. A. 1820. Efterretninger om Ous prestegjeld i Søndhordlehn meddelt 1817. Budstikken nr. 63/64.
- Kålås, S. 2008. Kartlegging av elvemusling (*Margaritifera margaritifera* L.) i Hordaland. Rådgivende Biologer AS rapport 1053. 22 sider.

- Kålås, S. 2012. Status for bestandar av elvemusling i Hordaland. Rådgivende Biologer AS rapport 1494, 57 s.
- Kålås, S. 2015. Undersøking av elvemusling i Døsjaelva, Os kommune. Rådgivende Biologer. Notat, 5 s.
- Kålås, S. 2016. Enkel undersøking av elvemusling i Røyrvikelva, Kvam herad. Rådgivende Biologer. Notat, 5 s.
- Kålås, S. 2017. Undersøking for av førekommst av elvemusling i nokre bekkar på austsida av Dåfjorden i Fitjar og Stord kommunar. Rådgivende Biologer, notat 4 s.
- Kålås, S. 2018. Synfaring av eit utval elvemuslingbestandar i Hordaland i 2016 og 2017. Rådgivende Biologer. Notat, 11 s.
- Kålås, S., A. E. Bjørklund & G. H. Johnsen. 1996. Kalkingsplan for Fitjar kommune. Rådgivende Biologer AS, rapport 192, 31 s.
- Kålås, S. & B.A. Hellen 2018. Undersøking av elvemuslingbestanden i Haukåselva sommaren 2018. Rådgivende Biologer AS, rapport 2714, 14 sider
- Kålås, S. & G. H. Johnsen. 2009. Vurdering av vassdrag i forbindelse med reguleringsplan for Marina i Apalvågen, Fjell kommune. Rådgivende Biologer AS, rapport 1269, 14 s.
- Kålås, S. & G. H. Johnsen 2012. Utbygging av Mjåtveitmarka og elvemuslingane i Mjåtveitvassdraget. Rådgivende Biologer AS rapport 1542, 16 s.
- Kålås, S. & S. Karlsson. 2018. Innsamling av elvemusling-DNA fra fire bestander i Hordaland 2018. Rådgivende Biologer AS, notat, 4 s.
- Kålås, S. & B. M. Larsen. 2012. Status for bestandar av elvemusling i Sogn & Fjordane 2010. Rådgivende Biologer AS rapport 1493, 36 s.
- Larsen, B. M. (red.) 2005. Overvåking av elvemusling i Norge. Årsrapport 2003 - NINA rapport 37, 55 s.
- Larsen, B. M. 2012. Redokspotensial som metode for å kartlegge substratkvalitet for elvemusling. Side 46-65 i: Larsen, B.M. (red.). Elvemusling og konsekvenser av vassdragsreguleringer: En kunnskapsoppsummering. Rapport Miljøbasert Vannføring 8-2012. 172 s.
- Larsen, B. M. 2017. Overvåking av elvemusling i Norge. Oppsummering av det norske overvåkingsprogrammet i perioden 1999-2015. - NINA Rapport 1350. 152 s.
- Larsen, B. M. & R. Hartvigsen. 1999. Metodikk for feltundersøkelser og kategorisering av elvemusling Margaritifera margaritifera. - NINA Fagrapport 37, 41 s.
- Larsen, B. M. & Karlsen, L.R. 2010. Overvåking av elvemusling i Norge. Årsrapport for 2008: Enningdalselva, Østfold. – NINA Rapport 566, 39 s.
- Larsen, B. M., R. Saksgård, & J. Magerøy. 2014. Overvåking av elvemusling i Norge. Årsrapport 2012: Oselva, Hordaland. - NINA Rapport 1061. 35 s.
- Larsen, B. M., K. Sandaas, K. Hårsaker & J. Enerud. 2000. Overvåking av elvemusling Margaritifera margaritifera i Norge. Forslag til overvåkingsmetodikk og lokaliteter. - NINA Oppdragsmelding 651, 27 s.
- Lura, H. & S. Kålås. 1994. Ferskvassfiskane si utbreiing i Sogn og Fjordane, Hordaland og Rogaland. Zoologisk museum, Universitetet i Bergen, 59 s.
- Magerøy, J. H. 2019. Evaluering av habitatkvalitet for juvenil elvemusling i Oslo og Akershus i 2017 og 2018. NINA Rapport 1540, 84 s.
- Miljødirektoratet. 2018. Handlingsplan for elvemulsing 2019-2028. Rapport m-1107, 63 s.

Stoeckle B. C., R. Kuehn & J. Geist. 2015. Environmental DNA as a monitoring tool for the endangered freshwater pearl mussel (*Margaritifera margaritifera* L.): A substitute for classical monitoring approaches? *Aquatic Conservation Marine and Freshwater Ecosystems* 26(6): 1120-1129.

Sweco 2016. Løkjelsvatn kraftverk. Konsekvensvurdering. Sweco. 189 s.

Söderberg, H. 1998. Undersökningstyp: Övervakning av flodpärlmussla. Del III i Eriksson, M.O.G., Henrikson, L. & Söderberg, H., red. Flodpärlmusslan i Sverige. Naturvårdsverket Rapport 4887. 138 s.

Taranger, A. 1889. De norske perlefiskerier i ældre tid. Norsk historisk tidsskrift 3. række, bind 1, s 186-237.

Vasshaug, Ø. & H. Grøndahl. 1990. Overvakning av lakseparasitten *Gyrodactylus salaris* i Hordaland fylke i 1989. Fylkesmannen i Hordaland, Rapport 3/90, 81 s.

Vibe. J. 1896. Norges land og folk. Topografisk-historisk-statistisk beskrivelse. XII. Søndre Bergenhus Amt.

Økland, J. & Økland, K.A. 1998. Database for funn av elvemusling *Margaritifera margaritifera* i Norge, etter arkivet til Jan og Karen Anna Økland. - Upublisert database NINA, Trondheim

## VEDLEGG

**Vedleggstabell 1.** Analyseresultat fra analysar av vassprøvar tekne i Fjordabekkjen 23. november 2013 og 9. april 2014. Analysane er utført av Eurofins (Prøvenr. 441-2013-1127-101 og 441-2013-0415-010).

Parameter	23. november 2013	9. april 2014	eining
Surhet	6,6	6,3	pH
Turbiditet	-	0,49	FTU
Alkalitet	0,082	0,065	mmol/l
Farge	47	25	mg Pt/l
Total Fosfor	5,2	5,5	µg/l
Nitrat-N	0,15	0,16	mg/l
TOC	5,1	3,9	mg/l
Kalium	0,62	0,61	mg/l
Kalsium	2,3	2,2	mg/l
Magnesium	0,76	0,89	mg/l
Natrium	5,7	7,3	mg/l
Klorid	9,7	13,5	mg/l
Sulfat	3,14	3,06	mg/l
Silisium	1000	550	µg/l
Aluminium	160	110	µg/l
Aluminium-reakтив	48	28	µg/l
Aluminium -illabilt	45	27	µg/l
Aluminium -labilt	3	1	µg/l

**Vedleggstabell 2.** Målingar av redokspotensial i Fjordabekkjen 3. september 2018. % av FW er prosentvis reduksjon i redokspotensial mellom ferskvassfasa og 5 cm nede i elvebotnen.

Lokalitet	koordinat	punkt	Redokspotensial	% av FW
1	32V 295363 6639747	1	595	2
		2	602	1
		3	574	6
		4	605	1
2	32V 295337 6639838	1	434	6
		2	494	16
		3	529	10
		4	460	15
		5	465	21
		6	418	30
		7	412	27
		8	529	9
		9	528	6
		10	413	29
Totalt	Gjennomsnitt		504	13
	Median		511	9

**Vedleggstabell 3.** Målingar av redokspotensial i Femangerelva 16. juli 2014. % av FW er prosentvis reduksjon i redokspotensial mellom ferskvassfasa og 5 cm nede i elvebotnen.

Lokalitet	koordinat	punkt	Redokspotensial	% av FW
1	32V 0320973 6669231	1	424	21
		2	431	20
		3	475	12
		4	469	13
		5	545	6
		6	97	83
		7	342	41
		8	554	4
		9	484	16
		10	550	5
		11	539	7
		12	575	2
		13	578	1
		14	552	4
		15	554	4
2	32V 03210143 6669227	1	425	24
		2	520	7
		3	401	28
		4	508	9
		5	367	35
		6	547	3
		7	515	9
		8	557	2
		9	464	19
		10	564	3
		11	539	8
		12	546	6
		13	576	1
		14	544	6
		15	564	3
Totalt	Gjennomsnitt		494	13
	Median		539	7

**Vedleggstabell 4.** Målingar av redokspotensial i Fossåa 18. juli 2014. % av FW er prosentvis reduksjon i redokspotensial mellom ferskvassfasa og 5 cm nede i elvebotnen.

Lokalitet	koordinat	punkt	Redokspotensial	% av FW
1	32V 0322743 6662696	1	504	6
		2	501	7
		3	508	6
		4	540	1
		5	531	1
		6	486	10
		7	262	51
		8	483	10
		9	298	45
		10	466	13
		11	250	54
		12	267	50
		13	473	12
		14	523	3
		15	267	50
2	32V 0322845 6662669	1	519	5
		2	472	14
		3	496	9
		4	490	10
		5	469	14
		6	498	9
		7	474	13
		8	473	13
		9	345	37
		10	388	29
		11	519	5
		12	445	18
		13	510	7
		14	524	4
		15	515	6
3	32V 0323920 6663640	1	480	6
		2	402	21
		3	520	5
		4	553	0
		5	465	15
		6	465	15
		7	526	4
		8	428	22
		9	422	23
		10	327	40
		11	238	57
		12	333	39
		13	505	8
		14	512	7
		15	298	46
Totalt	Gjennomsnitt		444	18
	Median		474	12

**Vedleggstabell 5.** Målingar av redokspotensial i Skjelåna 5. september 2018. % av FW er prosentvis reduksjon i redokspotensial mellom ferskvassfasa og 5 cm nede i elvebotnen.

Lokalitet	koordinat	punkt	Redokspotensial	% av FW
1	32 V 316065 6698088	1	346	33
		2	310	40
		3	279	46
		4	298	42
		5	239	54
2	32 V 316000 6698016	1	522	5
		2	463	16
		3	437	20
		4	536	2
		5	472	14
3	32 V 316003 6698023	1	453	13
		2	488	6
		3	509	2
		4	209	60
		5	256	51
Totalt	Gjennomsnitt		388	27
	Median		437	20

**Vedleggstabell 6.** Målingar av redokspotensiale i Åreidelva 4. september 2018. % av FW er reduksjonen i redokspotensial mellom ferskvassfasa og elvebotnen.

Lokalitet	koordinat	punkt	Redokspotensial	% av FW
1	32 V 290450 6629682	1	540	0
		2	531	5
		3	454	16
		4	510	6
		5	541	0
2	32 V 290494 6629714	1	333	38
		2	523	2
		3	396	27
		4	471	13
		5	346	35
3	32 V 290564 6629825	1	302	44
		2	254	53
		3	251	53
		4	304	43
		5	269	42
4	32 V 290439 6629657	1	218	59
		2	410	10
		3	214	59
		4	440	4
		5	424	20
		6	423	7
		7	448	15
		8	286	46
Totalt	Gjennomsnitt		386	26
	Median		410	20

**Vedleggstabell 7.** Målingar av redokspotensiale i Haukåselva 7. september 2018. % av FW er reduksjonen i redokspotensial mellom ferskvassfasa og elvebotnen.

Lokalitet	koordinat	punkt	Redokspotensial	% av FW
1	32 V 301129 6711362	1	219	57
		2	250	51
		3	114	78
		4	116	77
		5	234	54
2	32 V 301123 6711312	1	94	82
		2	194	62
		3	189	63
		4	126	75
		5	264	48
3	32 V 301127 6711341	1	434	19
		2	324	40
		3	504	6
		4	309	43
		5	349	35
4	32 V 301043 6711728	1	279	47
		2	270	49
		3	268	49
		4	228	57
		5	260	51
		6	216	59
		7	517	2
		8	346	35
5	32 V 300775 6711969	1	249	52
		2	314	39
		3	431	16
		4	354	31
		5	508	1
		6	503	2
6	32 V 300765 6711982	1	182	65
		2	203	61
		3	180	66
		4	168	68
		5	148	72
		6	153	71
Totalt	Gjennomsnitt		271	48
	Median		250	51

**Vedleggstabell 8.** Oppsummering av redokspotensialmålingar gjort i Femangerelva og Fossåa i Fusa kommune i 2014 og Fjordabekkjen, Fitjar kommune, Skjelåna, Samnanger kommune, Åreidelva, Bømlo kommune og Haukåselva i Bergen kommune i 2018. Gjennomsnitt og median for alle målingar i kvar elv, og gjennomsnitt og median for reduksjon i redokspotensial frå målingar i rennande vatn til målingar 5 cm nede i elvebotnen/substratet.

	Fjordabk.	Femanger	Fossåa	Skjelåna	Åreidelv	Haukåselv
Redokspotensial (mV)	Snitt Median	504 511	494 539	444 474	388 437	386 410
Reduksjon (%)	Snitt median	13 9	13 7	18 12	27 20	26 20
n		14	30	45	15	23
						35

**Vedleggstabell 9.** Elvar og vassdrag i Hordaland der det er kjent at det er eller har vore elvemusling. Sannsynleg tapte førekomstar er merka (†).

Lokalitet	Kommune	UTM (WGS 84)
Apeltunelva †	Bergen	32 V 297116 6691649
Arnaelva †	Bergen	32 V 305455 6703281
Fanaelva †	Bergen	32 V 297359 6685829
Haukåselva	Bergen	32 V 299844 6713679
Nesttunelva †	Bergen	32 V 298041 6693559
Åreidelva	Bømlo	32 V 290287 6629419
Sørelva-Etne	Etne	32 V 328889 6617421
Fjordabekkjen	Fitjar	32 V 295406 6639688
Apalvågelva	Fjell	32 V 278922 6697391
Femangerelva	Fusa	32 V 320401 6669513
Fossåa	Fusa	32 V 322541 6662809
Hopselva	Fusa	32 V 315569 6690251
Sundfjordelva	Fusa	32 V 321325 6661425
Sørelva Skjelbreid †	Fusa	32V 322755 6682677
Ljoneselva †	Kvam	32V 341787 6683742
Røyrvikelva	Kvam	32 V 340041 6683274
Fosseelva †	Meland	32V 294196 6716277
Mjåtveitvelva	Meland	32 V 293154 6714186
Bekk Særvoll †	Os	32 V 301752 6674757
Døsjaelva	Os	32 V 300609 6675998
Elv frå Bjørnavatnet †	Os	32 V 301887 6672784
Oselva	Os	32 V 304427 6677756
Loneelva	Osterøy	32 V 308042 6714374
Svenheimselva	Osterøy	32 V 309656 6715295
Skjelåna	Samnanger	32 V 315981 6697945
Kvernavikselva	Tysnes	32 V 300359 6665114
Reisoelva †	Tysnes	32 V 304715 6657084
Aalandselven †	Ukjent	Ukjent